

Irina rae Fureniro
Iesu'a Irina rae Furenirote'e
Goe'a
Ihore Goe'a

So'a 'ahi'e Ioane'a Patamo 'umuḡa 'ahogano mirihiro. Ani'e Iesu tahi'a gaubanana aheu fare bo'aḡano tahi'a 'ahoga. Iesu'a Ioane ahiri ra'aga iḡunaḡano zazore moneo nagini'a fur-eratite'e moneo irina ihonirota'a'e Ioane'a mir-ihiro. Ioane madaḡano ekalesia azaḡa'e Iesu mazao firo 'ahine aduga boro hidinu, e'ano'o so'a 'ahi hina ze inarazihi rae reiro. So'a 'ahi'e aduga boro zamaḡano zuni zamaze obone giganadu manohuga hidite'e moneo ihoziro ebu nouge-nouge zeḡe bare ruhibite'e moneo ḡoreziro. Ebu mada ḡonagano Iesu'a bare aradu agire azaḡa zu Satani ruize hunite'e rae fureniro. Fie gigaru'ete'e azaḡa'e adure iziga zu raha iziga diuḡadu Badi'a teite radi'uma onamo tuḡutuḡu rae ihoziro. So'a ahi'e hari idaidaḡa nunu zu vine ḡoe'a nunu hina mirihiro 'ahine, e'e huga nidu'a ederoga'e riḡa.

Goere Gadaheḡa

¹ Buka 'ahi'e Iesu Keriso'a irina rae furenirote'e ḡoe'a. A'e nagini'a nariga fureru hunite'e moneo Badi'a tuḡure azaḡa ihozoga veize Badi'a'a Keriso harote'e ḡoe'a. Ebu Keriso'a ane tuḡure viga'e ane tuḡure vazēḡa Ioane vaḡe tuḡunadu e'e ḡoe'a ihoniro.

² Eḡe, Ioane'a horonirote'e ḡauḡa nidu'a rae fureniro. A'e Badi'a ḡoere zu Iesu Keriso'a rae furenirote'e ḡoe'a.

³ Irina rae furenirote'e ḡoe'a 'ahi me'ode'ete'e vazēḡa'e manohuga hide'ohe. Iniu e'e ḡoe'a igi'ete'e zu buka 'ahi zamaḡano mirihirote'e ḡoe'a egohau'ete'e azaḡa'e manohuga hide'ohe, mazaḡa e'e ḡoe'ani'a hugano fureratite'e madaḡa'e haniteha.

Dubu Fu'o Aheu Fare mazao Uhiu Ḡoe'a Tuḡuriro

⁴ Eḡe, Ioane'a Asia haba'ano dubu fu'o aheu fare veize so'a 'ahi mirihe'ohe.

Izidi radiu'ete'e zu ibite radirote'e ebu vesu'u arite'e Badi'aḡa mazaono'o, ebu ani kini ehoro iḡu'a zamao radiu'ete'e viga fu'o aheu fare* mazaono'o,

⁵ ebu Iesu Keriso mazaono'o manōḡa zu zama roḡeḡa zae mazao radiu'eno'i. Iesu'e zamaḡa nidu'a hina ḡoere huga rae furene'ete'e vazēḡa, zu rune azaḡa bo'aḡano bare ḡabodirote'e vazēḡa ibi'a, zu raha kiniḡakiniḡa zuhi'azi'ete'e vazēḡa.

Iesu Keriso'e emeḡe zamare borofe'ohe, ebu ruḡa hina haḡaife sau'anono'o bohafe vaḡifiro.

⁶ Ani'a eme'e Badi'a'a zuhi'azi'ete'e azaḡano ohofiro zu Moga Badi'a veize gaue'ete'e dibu'o azaḡano ohofiro. Ani niḡa ḡihi'aḡa zu gigi'aḡa'e radiu tuḡutuḡu! Amen.

⁷ Ḡiano'i, ani'e ḡoze hina are'ohe.

Vaze nidu'a ubumaze hina ani horoni'uma,

* **1:4 1:4** Viga fu'o aheu fare'e Vine Zaḡoḡa inaraḡa boro rae idaniro.

ebu ani ġounirote'e azaġa zuni horoni'uma.

Rahao haba'ahaba'a azaġa nidu'a ani
horonadu niau ġoinahi'uma.

'Uguġani'a hube hune furera'uma. Amen.

⁸ Zuhi'a Boro Badi'a Gigi'aġani'a 'ahige ra'ohe,
“E'e Alefa zu Omega.”† Ani'e izidi radiu'ete'e zu
ibite radirote'e ebu vesu'u arite'e Badi'aġa.

Iesu'a Ioane mazao Fureraro

⁹ Eġe, Ioane'e zae nego. Iesu u'ano e zae
teite aduga hide'ohe, ebu Iesu'a zuhi'afi'ete'e
zamaġano zae teite tiburu radiu'ohe, ebu zae
teite zamahe obone gigane hune'ohe. E Badi'a
ġoere zu Iesu'a rae furenirote'e ġoe'a haramiro
'ahine, vase'a obohe teadu Patamo 'umuġano
tuġuhiro.

¹⁰ Zuhi'a Boro Madagaño‡ Vine Zaġoġani'a eġe
rana radirote'ea, eġe ġaruna ago boro 'ahoga
bigoro agoġa teige iġiro.

¹¹ Ago e'e'a 'ahige rae reiro, “Ġae'a horonate'e
ġauġa bukao miriho'i, ebu mirihirote'e bukaġa
ne boro fu'o aheu fare zamaġano dubu fu'o aheu
fare mazao tuġuro'i. Ne boroboro a'e Efeso,
Semurana, Peregamo, Tuatira, Sadesi, Filadelefa
ebu Laodikea.”

¹² E'ano'o e iniu'a ġoere'eta'a'e ederihi radu
tehiro. E'a tehirotene, golo hina haġairote'e
ihureġa odaġa fu'o aheu fare horoniro.

¹³ Ebu ihure odaġa nemaġano Vaze Ubuga
heuġa 'ahoga horoniro. Ani'e dabua faġa ovore

† **1:8 1:8** Giriki ġoe'a ibi'a zu ġonaga. Huga'e 'Ġadaheġa zu
Ġonaga'. ‡ **1:10 1:10** Iesu'a bare ġabodirote'e madaġa. Izidi'e
mada ibi'a, Sunday.

oda ḡonaga vidaro zu golo hina haḡairote'e miniga u'unigano utiro.

¹⁴ Ani vadini iguḡa'e mamoe iguḡa zu ḡoze heuḡa 'uruḡa. Ani ubuma'e ire roga duhuḡa heuḡa.

¹⁵ Ani oda'e kopa ire rogao kanimaranadu vevenirote'e teige vazavazahiro. Ani ago'e vu boro ḡuhigani'a noau'ete'e teigiro.

¹⁶ Ani buzuva fu'o aheu fare eda'e 'evo'ano oboniro, ebu benisi e'aḡa aheu'a hebe'anono'o bua ariro. Ebu ani iraḡa'e mada'a ḡihau hiau'ete'e teigiro.

¹⁷ Ani horonirotene, e rune vazega teige odaḡa babagano higau bauriro. 'Ougirotene, ani'a eda'e 'evo'a eḡe rana teadu 'ahige rae reiro, "Ago rihano'i. E'e ḡadaheḡa zu ḡonaga.

¹⁸ E'e radiu'ete'e vazega. E'e ibite rudaro rehano, ḡiano'i, e'e radiu tuḡutuḡu. E vase runeo mae tuḡuzite'e ibihetaḡa kiḡa meiro ebu rune azaḡa haba§ zuhi'ani'ohe.

¹⁹ E'ano'o ḡae'a horonate'e ḡauḡa miriho'i. Izidi fureru'ete'e ebu vesu'u fureratite'e ḡauḡa nidu'a horonadu miriho'i.

²⁰ Ḡae'a eḡe eda'e 'evo'ano buzuva fu'o aheu fare ebu golo hina haḡairote'e ihureḡa odaḡa fu'o aheu fare horoniro. E'e huga 'u'uruḡa'e 'ahi e'e: Buzuva fu'o aheu fare'e dubu fu'o aheu fare ibitozi'ete'e tuḡureḡa vigaviga,* ebu ihure odaḡa fu'o aheu fare'e dubu fu'o aheu fare."

2

§ 1:18 1:18 *Hadesi* * 1:20 1:20 *ekalesia ibitozi'ete'e azaḡa*

Efeso Ekalesia Zirote'e Ġoe'a

¹ Keriso'a eġe mazao 'ahige rae reiro, “Efeso ekalesia ibitozi'ete'e tuġureġa viga* veize 'ahige miriho'i:

'Buzuva fu'o aheu fare eda'e 'evo'ano obonirote'e ebu golo hina haġairote'e ihureġa odaġa fu'o aheu fare bo'aġano ragave'ete'e vazegani'a 'ahige ra'ohe:

² Efeso ekalesia, e za'a nagini haġairote'e, zu inare gauirote'e, zu zamaze obone giganirota'a'e edeġa. Ebu e zae'a sau'a azaġa mae ġihizoga mene idaġa rae ra'eta'a'e edeġa. Ebu zae'a mene apostolo azaġa'e ze zeġe'a bare apostolo azaġa rae furene'ete'e faine udahadu ze'e ġuriro azaġa rae furenirota'a'e zuni edeġa.

³ Ebu zae'a zamaze obone giganirote'e, zu eġe veize aduga hidadu zamaze rinedirote'e, ebu mene zorenirota'a'e e edeġa.

⁴ Rehano e'e ġau 'ahoga moneo zae roze'ohe. Za'a ġadaheġano eġe zu vaze zamare borofiro, rehano izidi'e 'uguġa zamaroneġa mae modiro.

⁵ E'ano'o za noumano'o uite buarota'a'e zamaro'i. Ġihuro'i ebu za'a ġadaheġano haġaidote'e haġaiġa haġao'i. Mene 'ouġine zu mene ġihurine, eġe'a zae vaġe amadu zae ihure odaġa'e iġu'انونو'o mae vaġini'uma.

⁶ U 'ahi'e zae'a faine haġae'ete'e haġaiġa: Za ġuriro ihore vazegā, niġa Nikolaita hegote'ete'e azaġa duġuru'a haġae'ete'e haġaiġa he'ehe'ene'ohe. Eġe zuni haġaize he'ehe'ene'ohe.

* **2:1 2:1** *ekalesia ibitozi'ete'e vazegā*

7 Iniu teḡaḡota ro'idene, Vine Zaḡoḡani'a ekalesia nidu'a mazao ḡoere'ete'e ego'i. Eḡe'a iniu sau'a ḡauḡa raharahane'ete'e azaḡa'e Badi'a meba manomano zamaḡano ḡabone zini'ete'e ireḡa maḡa anoga'e idaḡa rae re'uma.'"

Semurana Ekalesia Zirote'e Ḡoe'a

8 "Semurana ekalesia ibitozi'ete'e tuḡureḡa viga veize 'ahige miriho'i:

'Ḡadaheḡa zu ḡonaga, ebu rudanadu bare ḡabodirote'e vazegani'a 'ahige ra'ohe:

9 Semurana ekalesia, e zae'a aduga hide'ete'e zu za'e zahara azaḡa rae ra'eta'a'e edeḡa. Rehano za'e hube hune ma'ora azaḡa. Iniu zeḡe'a bare Iuda azaḡa rae ra'ete'e azaḡani'a za rae sausauze'eta'a'e edeḡa. Ze'e mene Iuda azaḡa, rehano Satani mone azaḡa.

10 Za'e vesu aduga hidite'e moneo ago rihano'i. Ḡiano'i, Diabolo'a zae tuhuzoga veize, zae bo'aḡano vase nu mae ḡu'a neḡano feuzi'uma ebu za'e mada gaubanana aduga hidi'uma. Aduga e'e u'ano rune hido'idene zuni, zamaze nidu'a hina fio'i. 'Ougine, eḡe'a kini vadini adiriḡa, ḡabone tuḡutuḡu zini'uma.

11 Iniu teḡaḡota ro'idene, Vine Zaḡoḡani'a ekalesia nidu'a mazao ḡoere'ete'e ego'i. Sau'a ḡauḡa raharahane'ete'e vazegane'a rune aheugani'a mene sausauni'uma.'"

Peregamo Ekalesia Zirote'e Ḡoe'a

12 "Peregamo ekalesia ibitozi'ete'e tuḡureḡa viga veize 'ahige miriho'i:

'Benisi naenae e'aḡa meirote'e vazegani'a 'ahige ra'ohe:

13 Peregamo ekalesia, e za'a noumao radiu'eta'a'e edeḡa. Zae radone haba'ano Satani'a kini ehoro iḡu'ano ehore'ohe. Rehano za'a eḡe ni obone giganiro. Zae haba, Satani'a radiu'ete'e haba'ano zama nidu'a hina eḡe moneo rae furenirote'e vazēḡa, niḡa Antipa maro. E'e madaḡano zuni, za'a eḡe mazao fie'ete'e mene modiro.

14 Rehano e zae mazao ḡau nu moneo roze'ohe. Zae bo'aḡano vase nu'a Balama ihore hegote'ohe. Balama'a Balaki ihonadu Balaki'a Isaraela azaḡa sau'a ibiḡano tutuziro. 'Ougadu Isaraela azaḡani'a ḡuriro badi'aḡa dibu'oharote'e ogomuḡa aro zu daroe futaro.☆

15 E'e teige, Nikolaita duḡuru ihore hegote'ete'e azaḡa nu'e zae bo'aḡano zuni radiu'ohe.

16 E'ano'o ḡihuro'i. Mene 'ougine, e ḡarihe amadu eḡe hebeono'o benisi hina sau'a azaḡa 'uguḡa teite utiti'uma.

17 Iniu teḡaḡota ro'idene, Vine Zaḡoḡani'a ekalesia nidu'a mazao ḡoere'ete'e ego'i. Sau'a ḡauḡa raharahane'ete'e vazēḡa'e, 'u'uru tirote'e ogomuḡa, mana nu eḡe'a ha'uma. Ebu eḡe'a hadi 'uruḡa ha'uma. Hadi e'e ragano'e ni iziga mirihoga. Vaze 'ahogani'a ni e'e mene ederi'uma, rehano iniu'a e'e meite'e vazēḡani'a da'o ederi'uma.'"

Tuatira Ekalesia Zirote'e Ḡoe'a

18 "Tuatira ekalesia ibitozi'ete'e tuḡureḡa viga veize 'ahige miriho'i:

☆ 2:14 2:14 Naba 22:5, 7, 25:1-3, 31:16; Goro 23:4

"Ahi'e Badi'a Ubuga ḡoere. Ani ubuma'e ire roga duhuḡa heuḡa, ebu ani oda'e kopa'a vazavazahoga heuḡa. Ani'a 'ahige ra'ohe:

¹⁹ Tuatira ekalesia, e za'a nagini haḡae'ete'e, eḡe zamare'ete'e, fie'ete'e, eḡe veize gaue'ete'e zu zamaze obone gigane'eta'a'e edeḡa. Ebu e edeḡa, za haḡaize 'uguḡa izidi ufeta haḡae'ohe, a'e ḡadaheḡano haḡairota'a'e vitinoga.

²⁰ Rehano e ḡau 'ahoga moneo za roze'ohe. Za'e roḡae 'ahoga, niḡa Isebele mae ḡihine'ohe. Ani ane'a bare peroveta vazēḡa rae hune'ohe. Ani'a eḡe tuḡure azaḡa ihozadu ze daro futau'ete'e zu ḡuriro badi'aḡa dibu'oharote'e ogo-muḡa au'ete'e ibiḡano tutuze ve'oze'ohe.

²¹ E roḡae e'e'a ḡihurifine mada nu haro, rehano ani ane daro haḡaiḡanono'o ḡihuroga mene uratiro.

²² E'ano'o eḡe'a ani aduga hanadu ani'e uḡini'uma ebu evane rana baze radi'uma. Iniu ani teite ubuma ḡezau'ete'e azaḡa'e ani haḡai hegote'ete'eano'o mene ḡihurine, zeḡe zuni aduga boro hidi'uma.

²³ Ebu eḡe'a ani hegote'ete'e azaḡa zimi ruzi'uma. 'Ougine, e'e vase zama zu zamaroneze udahe'ete'e vazēḡa rae ekalesia nidu'a ederi'uma. Eḡe'a zae tibatiba haḡaize idunaḡano naeḡa baronozini'uma.

²⁴ Rehano Tuatira azaḡa bo'aḡano vase 'ahoga'ahoga, zae zi'ohe. Za'a Isebele ihore mene hegotiro, zu Satani'a 'u'uru hune tirote'e ḡauḡa mene ederi'o. E'ano'o e zae rana aduga ḡauḡa 'ahoga mene mae ti'uma,

²⁵ rehano 'ahi da'o re'uma: Zae'a fie'ete'e zu ġoere huga hegote'ete'e obone gigano'i, onamo eġe'a ari'uma.

²⁶ Sau'a ġauġa raharahane'ete'e zu eġe gau haġae onamo ġonaga ma'ete'e vazegħa'e eġe'a haba'ahaba'a azaġa zuhi'azite'e gigi'aġa ha'uma.

²⁷ Ani'a auri somoriġa hina ze zuhi'azi'uma ebu taġora ġoġoreġa se'ene'ete'e teige zimi se'ezi'uma.✧

²⁸ Ane gigi'a'e eġe'a eġe Mama mazaono'o meirote'e gigi'aġa teigi'uma. Agire ġauġa raharahane'ete'e vazegħa'e eġe'a irara buzuvaġa zuni ha'uma.

²⁹ Iniu teġaġota ro'idene, Vine Zaġoġani'a ekalesia nidu'a mazao ġoere'ete'e ego'i."

3

Sadesi Ekalesia Zirote'e Ġoe'a

¹ "Sadesi ekalesia ibitozi'ete'e tuġureġa viga* veize 'ahige miriho'i:

'Badi'a viga fu'o aheu fare zu buzuva fu'o aheu fare obone'ete'e vazegħani'a 'ahige ra'ohe:

Sadesi ekalesia, e zae haġai edeġa. Vaze'a za'e ġaboga rae niguze'ohe, rehano za'e ruga.

² Evato'i. Zae mazao haġai manoġa tahiġa 'ize radiu'ete'e inarano'i. Haġai manoġa a'e nariga rudau'ohe. E za horoze'etene, zae haġai'e eġe Badi'a ubumao duduġa hune rae rouga mene idaġa.

³ E'ano'o zae'a meirote'e zu igirote'e ġoe'a zamaro'i. E'e ġoe'a ego'i ebu haġaize sau'anono'o

✧ 2:27 2:27 Salamo 2:9; Irina rae fureniro 12:5, 19:15

* 3:1

3:1 ekalesia ibitozi'ete'e vazegħa

gihuro'i. Za mene evatine, e ġonore vazegħa teige ami'uma ebu e'a no'e madaġano amita'a'e za mene ederi'uma.

⁴ Rehano Sadesi zamaġano dabuaze mene toranirote'e azaġa nu'e zae bo'aġano radiu'ohe. Ze'e dabuaze 'uruġa vidanadu eġe teite ragavi'uma, mazaġa ze'e 'ouge haġaoga'e idaġa.

⁵ Sau'a ġauġa raharahane'ete'e vazegħa'e zeġe teige dabua 'uruġa vidozini'uma. Eġe'a iniu ġabozite'e azaġa ni mirihirote'e bukaġano ani ni'e mene fahi'uma. Ebu eġe Mama zu ane tuġure vigaviga ubumao eġe'a ani'e eġe none vazegħa rae furen'i'uma.

⁶ Iniu teġaġota ro'idene, Vine Zaġoġani'a ekalesia mazao ġoere'ete'e ego'i."

Filadelefia Ekalesia Zirote'e Ġoe'a

⁷ "Filadelefia ekalesia ibitozi'ete'e tuġureġa viga veize 'ahige miriho'i:

"Ahi'e zaġoġa zu huga vazegħa ġoere. Ani'e kini Davida kiġa obonirote'e teige, inaraġa boro meiro. 'Ani'a ibiheta vava'ine, vase 'ahogani'a haranoga mene idaġa, ebu ani'a haraune vase 'ahogani'a vava'oga mene idaġa:

⁸ Filadelefia ekalesia, e zae haġai edeġa. Ġiano'i, eġe'a zae zamao ibiheta 'ahoga vavae tiro. Ibiheta a'e vase 'ahogani'a haranoga mene idaġa. E edeġa inaraze'e tahiġa, rehano za eġe ġoere hegotiro zu nihe mene o'oniro.

⁹ Vaze nu'e Satani duġuru mone azaġa. Ze'e mene Iuda azaġa rehano, ze zeġe'a bare Iuda azaġa rae ġurire'ohe. Eġe'a ze tutuzadu zae vaġe ami'uma. Eġe'a ze tutuzadu ze'e zae oda

babaḡano ḡuḡuri'uma zu eḡe'a za zamarirota'a'e ze ederi'uma.

¹⁰ E za 'ahige rae ziro, “Aduga zamaḡano zamaze obone gigano'i.” E'e ḡoe'a zae'a hegotiro 'ahine, aduga boro madaḡano eḡe'a zae biri'uma. Aduga boro a'e rahao radiu'ete'e azaḡa tuhuzifine raha 'ahi nidu'a zamaḡano furera'uma.

¹¹ E'e ḡarihe ami'uma. Za'a meite'e naeḡa, kini vadini adiriḡa'e vaze 'ahogani'a mene meifine, zae'a fie'ete'e zu ḡoere huga hegote'ete'e obone gigano'i.

¹² Sau'a ḡauḡa raharahane'ete'e vazega'e eḡe'a eḡe Badi'a kuru neḡa gadoḡa teige ohoni'uma, ebu ani kuru neḡa a'e mene bare modi'uma. Eḡe'a eḡe Badi'a ni ebu eḡe Badi'a ne boro ni ani rana mirihi'uma. Badi'a ne boro adureo eḡe Badi'a mazaono'o ovae'eta'a'e Ierusalema iziga. Ebu eḡe'a eḡe ni iziga ani rana mirihi'uma.

¹³ Iniu teḡaḡota ro'idene, Vine Zaḡoḡani'a ekalesia mazao ḡoere'ete'e ego'i.”

Laodikea Ekalesia Zirote'e Ḡoe'a

¹⁴ “Laodikea ekalesia ibitozi'ete'e tuḡureḡa viga veize 'ahige miriho'i:

"Ahi'e Amen rae hune'ete'e vazega ḡoere. Ani'e zamaḡa nidu'a hina haḡae'ohe zu Badi'a ḡoere hugano rae furene'ohe. Ani'e Badi'a'a haḡairote'e ḡauḡa nidu'a zuhi'azi'ete'e vazega:

¹⁵ Laodikea ekalesia, e zae haḡai edeḡa. Za'e mene vu gigi'a heuḡa, ebu zuni mene vu nahuga heuḡa. E za'e vu gigi'a heuḡa ga vu nahuga heuḡa urate'ohe.

16 Rehano za'e mene gigi'a ebu zuni mene nahuga. Za'e vu gigigigi'a heuḡa. E'ano'o eḡe'a za'e eḡe hebeono'o nariga furure vase'ohe.

17 Za zae'a ma'ora azaḡa zu ḡau ḡehaḡa meiro rae ra'ohe, ebu zae mazao ḡau 'ahogani'a fer-eze'eta'a'e o'o'a rae ra'ohe. Rehano za aḡu'a, zae mazao aduga da'o radu matu'u 'ahogani o'o'a. Za'e vetuḡaḡa, zaharaḡa, ubumaze kuruḡa, zu firina.

18 E'ano'o eḡe'a za iraduguze'ohe. Za'e ma'ora azaḡa reifine eḡe mazaono'o ire roga hina vevenirote'e goloḡa hoito'i. Ebu zae firina mazagarōḡa 'uadu za firine'eta'a'e vase'a mene horozifine, dabua 'uruḡa hoitadu vidano'i. Ebu ra'afine, ubuma muramuraḡa hoitadu ubumaze rana sorono'i.

19 Eḡe'a zamare borofe'ete'e azaḡani'a haḡai sau'a haḡae'etene, e roze'ohe zu sinasinaze'ohe. E'ano'o haḡai sau'a mene haḡaifine inaro'i zu ḡihuro'i.

20 Ḡiano'i. E ibiheta babaḡano edanadu toke-tokere'ohe. Iniu'a eḡe ago egadu ibiheta e'e vava'ine, e diuḡadu ani teite oga'uma zu ani'e eḡe teite oga'uma.

21 Sau'a ḡauḡa raharahane'ete'e vazēḡa'e eḡe kini ehorō iḡu'ano eḡe teite ehoroga'e idaḡa rae re'uma. A'e eḡe'a sau'a ḡauḡa raharahanirote'e enogano, e eḡe Mama kini ehorō iḡu'ano ani teite ehorirote'e teiḡi'uma.

22 Iniu teḡaḡota ro'idene, Vine Zaḡoḡani'a ekalesia mazao ḡoere'ete'e ego'i."

4

Adure Kuruḡa

¹ E'e enogano eḡe'a horonirotene, adureo ibi-heta 'ahoga vava'oga'e e'e. Ebu ibite eḡe'a igirote'e agoḡa, bigoro agoḡa teigirote'e'a 'ahige rae reiro, "Ahi eroi. 'Ahi enogano nagini'a fureru hunite'e eḡe'a iho'i'uma."

² Vine Zaḡoḡani'a ḡarihe fase eḡe ragatiro ebu e adureo kini ehoru iḡu'a 'ahoga horoniro. E'e rana vase 'ahogani'a ehore radiro.

³ E'e rana ehore radiu'ete'e vazega iraḡa'e agaḡa 'uruḡa zu kanaḡani'a agararo. Agaḡa a'e hadi 'uruḡa naeḡa boro niḡa iasipa zu hadi kanaḡa naeḡa boro niḡa sadio heuḡa. Ebu kini ehoru iḡu'a'e mezona'e hadi ḡabodoraḡa naeḡa boro niḡa samaragi teige varahuniro.

⁴ Ebu kini ehoru iḡu'a a'e kini ehoru iḡu'a 'ahoga nidu'a 24'a varahe huniro, ebu ekalesia ibitozi'ete'e azaḡa 24'a e'e ehoru iḡu'ano ehore radiro. Ze'e dabua 'uruḡa haḡairo zu vadinizeo golo hina haḡairote'e kini vadini adiriḡa ridiro.

⁵ Kini ehoru iḡu'a e'eano'o agaru vazahe ovairo ebu viri'a fu'uradu gudaro. Kini ehoru iḡu'a e'e zamao ihure mozareḡa fu'o aheu fare'a duhuru agaru radiro. Ihure a'e Badi'a viga fu'o aheu fare.

⁶ Kini ehoru iḡu'a e'e zamao'e galasi hina haḡairote'e davaraga heuḡa e'e. A'e naeḡa boro hadiḡa niḡa kirisita teige deheḡa bagaḡa.

Kini ehoru iḡu'a e'e varahoga ḡonaga ḡazaḡano ḡaboga ḡauḡa ḡazaḡa'e e'e. Ze'e zama zu ḡaruni moneo ubuma da'oda'oroga.

⁷ Ġaboga ġauġa ibi'a'e laioni heuġa, aheuġa'e boromakau ubuġa ohozeġa heuġa, uġiduġa'e vaze iraġa heuġa, ebu ġazaġa'e rafi'u'ete'e ugabadaġa heuġa.

⁸ Ġaboga ġauġa ġazaġa tibatiba'e isaze fu'o tiba farezeta. Isaze zamaġa zu enoga nidu'a'e ubuma da'oda'oroga. Madai zu ohere ze 'ahige ġoeroga mene hune ri'i'ohe,

“Zaġoġa, zaġoġa, zaġoġa!

Zuhi'a Boro Badi'a Gigi'a hune!

Ibite radiro, izidi radiu'ohe, zu vesu'u arite'e Badi'aġa.”

⁹ Badi'a'e radiu tuġutuġu, zu kini ehoru iġu'ano ehore radiu'ohe. Ġaboga ġauġani'a ani ni mae ġihine'ohe, zu gubane'ohe, zu ani mazao manōġa tauġi rae ra'ohe.

¹⁰ Ze 'ouge haġae'etene, ekalesia ibitozi'ete'e azaġa 24'a kini ehoru iġu'ano ehore'ete'e zu radiu tuġutuġe'ete'e vazēġa zamao ġuġuradu kurau'ohe. Ebu ze vadinize rana ridirote'e kini vadini adiriġa mae vaġinadu kini ehoru iġu'a e'e zamao mae ti'ohe, ebu 'ahige rae ra'ohe,

¹¹ “Emeġe Zuhi'a Boro Badi'a!

Vaze'a niġo mae ġihinoga, guba'oga zu gigi'aġo niġunoga'e duduġa hune, mazaġa ġae'a ġau nidu'a haġairo.

Ġae urao ze'e 'ize radiu'ohe zu ġabone meiro.”

5

So'a Ġuaġa ebu Mamoe Ubuġa

¹ Ebu hena e kini ehoru iġu'ano ehore radiu'ete'e vazēġa 'evore eda'eġano so'a ġuaġa

'ahoga horoniro. E'e so'aḡa ḡuaḡa zamaḡano zu enogano'e ḡoere mirihiro, ebu vase 'ahogani'a mene vava'oga veize kadaḡa nidu'a fu'o aheu fare hina so'a ḡuaḡa kadane 'uiro.

² Ebu e tuḡure viga gigi'aḡani'a ago boro hina 'ahige rae furenirote'e horoniro, "Iniu'a so'a ḡuaḡa rana kadaḡa e'e mae vaḡinadu vava'oga'e idaḡa?"

³ Rehano vase 'ahogani'a so'a ḡuaḡa vava'oga zu zamaḡa ḡianoga mene idararo. Adureo ga rahao ga raha 'u'uḡano zuni o'o'a hune.

⁴ So'a ḡuaḡa e'e vava'adu zamaḡa ḡianoga'e idaḡa ra'ete'e vazeḡa 'ahoga mene horoniro 'ahine, e niau rudaro.

⁵ Rehano ekalesia ibitozi'ete'e azaḡa bo'aḡano 'ahogani'a 'ahige rae ihiro, "Ago niano'i. Ḡiano'i, Iuda urabo vazeḡa 'ahoga, kini Davida mariga ḡihi'a hune, Laioni rae hune'ete'e vazeḡani'a agire ḡauḡa raharahaniro. Ani'e kadaḡa fu'o aheu fare mae vaḡinadu so'a ḡuaḡa vava'oga'e idaḡa."

⁶ Ebu e mamoe ubuga 'ahoga horoniro. Ani iraḡa'e vase'a marote'e heuḡa. Ani'e ḡaboga ḡauḡa ḡazaḡa zu ekalesia ibitozi'ete'e azaḡa 24 nemaḡano, kini ehoru iḡu'a zama none nemaο edau radiro. Ani araḡa'e fu'o aheu fare zu ubumaḡa'e fu'o aheu fare. Ubuma fu'o aheu fare a'e Badi'a'a haba nidu'a tuḡuzirote'e viga fu'o aheu fare.

⁷ Mamoe ubugani'a aradu kini ehoru iḡu'ano ehorirote'e vazeḡa 'evore eda'eḡanono'o so'a ḡuaḡa e'e meiro.

⁸ Ani'a e'e meirotene, ḡaboga ḡauḡa ḡazaḡa

zu ekalesia ibitozi'ete'e azağa 24'a mamoe ubuga zamao ġuġuriro. Zeġe nidu'a'e gabizeta ebu golo hina haġairote'e ġoġoreğa oboniro. Ġoġore e'e zamaġano'e 'uvahu hohoġani'a iri'aviro. 'Uvahu hohoġa'e Badi'a mone azağa kuru.

⁹ Ebu ze bada iziga 'ahige badahiro,
“Ga'e so'a ġuağa e'e mouga'e idağa,
zu e'e rana kadağa mae vaġinadu so'a ġuağa
e'e vava'oga'e idağa.

Mazağa vase'a ġamiro,
ebu ġa ġae ru hina
urabo nidu'a, ġoere nunu azağa nidu'a,
vaze nunu nidu'a, zu haba'ahaba'a
azağa nidu'a haġaize sau'anono'o bohaze
buziro, ebu ze tutuzadu Badi'a haro.

¹⁰ Ġae'a ze'e Badi'a'a zuhi'azi'ete'e azaġano tu-
tuziro, ebu Badi'a veize gaue'ete'e dibu'o
azaġano ohoziro.

E'ano'o ze'e rahao ġau nidu'a zuhi'azi'uma.”

¹¹ Ebu hena e tuġure viga ġehağa horoniro
zu agoze igiro. Ze kini ehoru iġu'a zu ġaboga
ġauġaġauġa ebu ekalesia ibitozi'ete'e azağa
varahiro. Ze'e ufeta ġehağa bagağa radu zeġe
nidu'a me'odoga zuni mene idararo.

¹² Ze'e ago boro hina 'ahige badahiro,
“Vaze'a marote'e Mamoeğa Ubuga'e
gigi'ağa, ma'orağa, huhuzağa zu inarağa hune.
Badi'a'a haġairote'e ġauğa nidu'a'e ani
gubani'uma zu niġa mae ġihini'uma zu
niġuni'uma!”

¹³ Ebu hena adureo, rahao, raha 'u'uġano
zu davarao—haba'a nidu'a zamaġano Badi'a'a

haḡairote'e ḡauḡa nidu'a 'ahige badahe'ete'e igiro,

“Kini ehorō iḡu'ano ehore'ete'e vazēḡa zu Mamoe Ubuga

niguzihi, gubazihi, nize mae ḡihizihī, zu gigi'aze niguzihi,

onamo tuḡutuḡu!”

¹⁴ 'Ougadu ḡaboga ḡauḡa ḡazaḡani'a 'ahige rae reiro, “Amen!” Ebu ekalesia ibitozi'ete'e azaḡani'a Badi'a zu Mamoe Ubuga mazao ḡuḡuradu kuraro.

6

Kadaḡa Fu'o Tiba Fare mae Vaḡiniro

¹ Ebu hena e Mamoe Ubugani'a kadaḡa fu'o aheu fare bo'aḡano tiba mae vaḡinirote'e horoniro. Ebu ḡaboga ḡauḡa ḡazaḡa bo'aḡano 'ahogani'a viri gugugā agoḡa heuḡa hina 'ahige ra'ete'e igiro, “Aroi!”

² Ebu eḡe'a ehamarotene, hosi 'uruḡa 'ahoga'e e'e. E'e rana ehorirote'e vazaga'e feva oboniro, ebu Badi'a mazaono'o kini vadini adiriḡa meiro. Ani'a onamadu agire azaḡa raharahaziro, ebu bare raharahazoga veize onamiro.

³ Mamoe Ubugani'a kadaḡa aheuḡa mae vaḡinirotene, e ḡaboga ḡauḡa aheuḡani'a 'ahige ra'ete'e igiro, “Aro'il!”

⁴ 'Ougirotene, hosi 'ahoga kanaḡa bagaḡani'a fureraro. Hosi e'e rana ehorirote'e vazega'e Badi'a mazaono'o inara zu benisi boro meiro. E'e inaraḡa'e raha azaḡani'a utite ro'oretitoga veize raha 'adano'o uniho manoḡa mae vaḡine'ete'e inaraḡa.

5 Mamoe Ubugani'a kadağa uğiduğa mae vağinirotene, e ġaboga ġauğa uğiduğani'a 'ahige ra'ete'e igiro, "Aroi!" Ebu e ehamarotene, hosi ġu'a 'ahoga'e e'e. E'e rana ehorirote'e vazega'e 'evo'ano ġau 'ahoga oboniro. E'e ġauğa'e aduga ga ufiğa udahe'ete'e ġauğa.

6 Ebu e ġaboga ġauğa ġazağa nemağanono'o ago 'ahoga heuğani'a hosi e'e rana ehorirote'e vazega mazao 'ahige ra'ete'e igiro, "Ogomu ferezo'i. Mada tiba gauğa naeğa* hina vuidi kilo tiba da'o hoitoga idara'uma, ebu mada tiba gauğa naeğa hina bali kilo uğidu da'o hoitoga idara'uma. Rehano olivi dehoroga zu vaini vuğa ago sausauno'i."

7 Mamoe Ubugani'a kadağa ġazağağa mae vağinirotene, e ġaboga ġauğa ġazağağani'a 'ahige ra'ete'e igiro, "Aroi!"

8 Ebu e'a horonirotene, hosi borağa ġabodorağa 'ahoga'e e'e. E'e rana ehorirote'e vazega niğa'e Rune. Ebu rune azağa haba niğa Hadesi'a Rune ġaruna hegotinu. Ze'e haba nidu'aono'o haba ġazağano rovonadu haba tiba zamağano radiu'ete'e azağa zimi'ete'e inarağa Badi'a mazaono'o meiro. Ze benisi, zaga, ugi, ebu rahao butu agireğa hina vase zemoga'e idağa rae reiro.

9 Mamoe Ubugani'a kadağa fu'oğa mae vağinirotene, e vase nu vineze'e dibu'o fatağa 'u'uğano radoga horoziro. Ze'e Badi'a ġoere haramirote'e u'ano zu ze'a rae furenirote'e ġoe'a u'ano, vase'a zimirote'e azağa viga.

* 6:6 6:6 *denari tiba*

10 Ze agoze boro hina 'ahige huario, “Zuhi'a Boro Gigi'ağa Hune, ġa'e zaġoġa zu huga. Ġa no'e madaġano raha 'adao radiu'ete'e azaġa kotazi'uma, zu eme'a rufe soronirote'e u'ano naeze baronozini'uma? Eme mada faġa nugu guhi'i'uma?”

11 Zeġe nidu'a'e Badi'a mazaono'o dabua 'uruġa meiro. Ebu Badi'a'a 'ahige rae ziro, “Mada tahiġa bare ahirize ohono'i, onamo vase'a zae zimirote'e teige, zae teite gauirote'e tuġure azaġa ebu ekalesia nego nabudi nu'e zimi'uma. Eġe'a runeo tuġuzi'uma rae ohotirote'e azaġa naba nidu'a iri'avine, naeze baronozini'uma.”

12 E Mamoe Ubugani'a kadaġa fu'o tiba fareġa mae vaġinirote'e horoniro. E'e madaġano raha'a borofe hagariro, zu mada'a dabua baruġa ġu'a teige ġutaro, ebu bato'a ru teige kanararo.

13 Adureo buzuva'e zavara boro'a zaidanadu figi ireġaono'o figi maġa gogoġani'a rururarote'e teige, rahao rururaro.

14 Adure'e so'a ane'a bare ġuau'ete'e teige dauġiro. Maġa nidu'a zu 'umu nidu'a iġurizeono'o mae vaġiziro.

15 'Ougirotene, rahao kini azaġa, zuhi'a azaġa, uti azaġa boroboro, ma'ora azaġa, inara borozeta azaġa, tuġure azaġa, zu mene tuġure azaġani'a hadi ho'ogano zu maġamaġa vatavaġa bo'aġano u'uraro.

16 Ze'e maġa zu vatava mazao 'ahige rae huario, “Eme fikifadu kini ehoru iġu'ano ehore'ete'e Badi'aġa ubumaono'o zu Mamoe Ubuga zama ġugi'anono'o eme mae 'u'uru to'i.

17 Badi'a zu Mamoe Ubuga zamaze'a ġugize'ete'e madaġa boro'a ariro. Iniu'a zamaze ġugiono'o ġabodoga'e idaġa re'uma? O'o'a hune!"

7

Isaraela Azaġa 144,000 Imoriro

¹ E'e enogano e tuġure viga ġazaġani'a raha genaġa ġazaġano edau'enoga horoziro. Ze zavar'a raha rana ga davara rana ga ireni 'ahoga rana mene zaidanoga veize, zavar'a ġazaġa obonadu 'ue radiro.

² Ebu e tuġure viga 'ahogani'a mada'a ite'ete'e moneono'o ite feure'enoga horoniro. Ani'e ġabode radiu'ete'e Badi'aġa mazaono'o imoro meiro. Ani haba zu davara sausaune'ete'e ġiġi'aġa meirote'e tuġureġa viga ġazaġa mazao aġoġa boro hina 'ahige huau ziro,

³ "Haba ga davara ga ire ago sausauno'i, on-amo eme'a emeġe Badi'a tuġure azaġa zehereze rana imorozi'uma."

⁴ Ebu e iniu imorozirote'e azaġa nidu'a'e nugu rae igiro. A'e Isaraela azaġa urabo nidu'aono'o vaze nidu'a 144,000.

⁵ Urabo tibatibaono'o imorozirote'e azaġa nabaġa'e 'ahi e'e:

Iuda uraboono'o 12,000,

Rubena uraboono'o 12,000,

Gado uraboono'o 12,000,

⁶ Asere uraboono'o 12,000,

Nafatali uraboono'o 12,000,

Manase uraboono'o 12,000,

⁷ Simeona uraboono'o 12,000,

Levi uraboono'o 12,000,
Isakara uraboono'o 12,000,
⁸ Zebuluno uraboono'o 12,000,
Iosefa uraboono'o 12,000,
Beniamini uraboono'o 12,000.

Dabua 'Uruḡa Vidarote'e Azaḡa Ġuḡuvaḡa

⁹ E'e enogano e vase ḡuḡuvaḡa horoziro. Ze'e ufeta ḡehaḡa radu vazeni 'ahogani'a ze me'odoga'e mene idararo. Ze'e haba nidu'aono'o, urabo nidu'aono'o, vase nunu nidu'aono'o, zu ḡoere nunu azaḡa nidu'aono'o ariro. Ze'e dabua 'uruḡa vidaro, zu 'evorezeo sigi rouḡa oboniro, ebu kini ehoro iḡu'a zamao zu Mamoe Ubuga zamao edau radiro.

¹⁰ Ebu ze'e ago boro hina 'ahige huau reiro, “Kini ehoro iḡu'ano ehore'ete'e vazega, emege Badi'a,

zu Mamoe Ubugani'a eme ḡabofe'ohe!”

¹¹ Tuḡure viga nidu'a kini ehoro iḡu'a zu ekalesia ibitozi'ete'e azaḡa zu ḡaboga ḡauḡa ḡazaḡa edau varahiro. Ebu ze kini ehoro iḡu'a zamao ḡuḡuradu Badi'a mazao kuraro.

¹² Tuḡure viga nidu'a 'ahige rae reiro,

“Amen!”

Badi'a'e ḡihi'a hune zu huhuzaḡa, ebu gigi'aḡa zu inaraḡa'e boro hune.

Eme ani ni mae ḡihinihi,
ani mazao manoga tauḡi reihi,
zu ani gubanihi, onamo tuḡutuḡu.

Amen!”

¹³ Ebu hena ekalesia ibitozi'ete'e azaḡa bo'aḡano 'ahogani'a 'ahige ḡadihiro, “Dabua

'uruḡa vidarote'e azaḡa 'ahi'e iniu? Ze'e noumano'o areha?"

¹⁴ Ebu e 'ahige naenaeniro, "Vaze boro, a'e ḡae edeḡa." Ebu ani'a 'ahige ihiro, "'Ahi azaḡa'e aduga boro zamaḡano zamaze obone giganirote'e azaḡa. Ze'e Mamoe Ubuga ruḡa zamaḡano dabuaze vuzu'adu dabuaze'a 'uraro.

¹⁵ E'e u'ano,
ze'e Kini Badi'a ehoru iḡu'a zamao edau'ohe,
ebu madai zu ohereo ane kuru neḡano ane
veize gaue'ohe.

Ebu kini ehoru iḡu'ano ehore'ete'e Badi'aḡani'a
taruhazi biri'uma.

¹⁶ Ze'e mene bare vinizi'uma,
mene bare irine mo'ozi'uma.

Mada'a ze mene iri gigizi'uma,
gigi'a bagaḡa 'ahogani'a ze mene iri'uma.

¹⁷ Kini ehoru iḡu'a nemaḡano radiu'ete'e
Mamoeḡa Ubuga'e mamoe taufe'ete'e
vazeḡa teige ze taufi'uma,
ebu ani'a ze tutuzadu ḡabone zini'ete'e
iduḡa vuḡa vaḡe onami'uma.

Ebu Badi'a'a ubumazeono'o nize vuḡa nidu'a
zauhozini'uma."

8

Kadaḡa Fu'o Aheu Fareḡa mae Vaḡiniro

¹ Mamoe Ubugani'a kadaḡa fu'o aheu fareḡa
mae vaḡinirotene, adure'e mada tahiḡa sifu
radiro.

² Ebu e Badi'a zamao edau'ete'e tuḡureḡa viga
fu'o aheu fare horoziro. Zeḡe nidu'a Badi'a
mazaono'o bigoro meiro.

³ Ebu tuḡure viga 'ahogani'a dibu'o fataḡa uhiḡano aradu edaro. Ani'e 'uvahu hohoḡa hufi'ete'e ḡoḡoreḡa golo hina haḡairote'e obone radiro. Ani'e tuḡure viga 'ahoga mazaono'o 'uvahu hohoḡa boro багаḡa meiro. Ebu 'uvahu hohoḡa e'e Badi'a mone azaḡa nidu'a kuruze teite kini ehoro iḡu'a zamao golo hina haḡairote'e dibu'oḡa fataḡa rana dibu'oharo.

⁴ Ebu tuḡure vigani'a 'uvahu hohoḡa hufi'etene, ḡisiḡani'a Badi'a mone azaḡa kuruze teite tiburu ani 'evoreono'o Badi'a vaḡe itiro.

⁵ Ebu hena tuḡure vigani'a 'uvahu hohoḡa hufi'ete'e ḡoḡoreḡa madu dibu'o fataḡanono'o ire roga hina iri'avoniro, ebu raha rana ḡuzuni feuniro. 'Ougirotene, viri'a agaru vazahiro, zu ḡihau gudaro, ebu fu'uriro, zu raha'a hagariro.

Bigoro Fu'o Aheu Fare

⁶ Ebu hena tuḡure viga fu'o aheu fare'a bigoro fu'o aheu fare madu hodoga veize ruhibiro.

⁷ Tuḡure viga ibi'aḡani'a bigoroḡa hudirotene, ḡoze hatu'aḡa zu ire roga'e ru teite tiburanadu rahao rururaro. Ebu raha nidu'aono'o uḡide rovonadu tiba mone rovonoga rahaḡa'e hufi haoniro. Ebu ire nidu'aono'o uḡide rovonadu tiba mone rovonoga ireḡa hufi haoniro, zu imi ḡabodoraḡa e'e rahaḡa nidu'a hufi haoniro.

⁸ Tuḡure viga aheugani'a bigoroḡa hudirotene, maḡa boro ire roga'a iri'ete'e teige'eta'a'e davarao mae feuniro. Ebu davara nidu'aono'o davara uḡide rovonadu tiba mone rovonoga davaraḡa'e ru reiro.

9 Davarao ġaboga ġauġa nidu'aono'o uġide rovonadu tiba mone ġaboga ġauġa'e rudaro. Ebu ġasi boro nidu'aono'o uġide rovonadu tiba mone rovonoga ġasiġa'e faharo.

10 Tuġure viga uġiduġani'a bigoroġa hudirotene, buzuva 'ahoga boro багаġani'a ihure teige duhuru agaru'ena'a, adureono'o rururaro. A'e vu boro nidu'aono'o uġide rovonadu tiba mone rovonoga vuġa boro rana zu idu vuġa rana rururaro.

11 Buzuva e'e niġa'e Agi'a. E'ano'o ani'a vu boro nidu'aono'o uġide rovonadu tiba mone rovonoga vuġa boroboro aginiro. Ebu agitarote'e vuġa u'ano, vase ġehaġani'a e'e gagadu rudau ġouriro.

12 Tuġure viga ġazaġaġani'a bigoroġa hudirotene, mada nidugaono'o uġide rovonadu tiba mone madaġa'e sausauniro. Ebu bato nidugaono'o uġide rovonadu tiba mone rovonoga'e sausauniro, zu buzuva nidu'aono'o uġide rovonadu tiba mone rovonoga buzuvaġa'e sausauniro. 'Ougadu zeġe agaġa nidu'aono'o uġide rovonadu tiba mone rovonoga agaġani'a dauġiro. E'ano'o madai agaġa nidu'aono'o uġide rovonadu tiba mone rovonoga agaġani'a dauġiro, ebu ohere agaġa nidu'aono'o uġide rovonadu tiba mone rovonoga agaġani'a dauġiro.

13 Ebu hena e'a ehamaro zu igirotene, ugabada tibani'a adure nemaġano rafi'u'ena'a, agoġa boro hina 'ahige rae reiro, "Aduga boro hidi'uma! Aduga boro hidi'uma! Rahao radiu'ete'e azaġani'a aduga boro hidi'uma, mazaġa tuġure

viga uḡidu'a bigoroze nariga hudi'ohe ebu ze aduga boro hidi'uma!"

9

¹ Tuḡure viga fu'oḡani'a bigoroḡa hudirotene, e adureono'o rahao rururarote'e buzuvaḡa 'ahoga horoniro. E'e buzuvaḡani'a iniuno'o idu vo hune* ibiḡa vava'e'ete'e kiḡa meiro.

² Buzuva e'e'a idu vo hune e'e vava'irotene, e'eano'o ḡisi boro'a ite buaro. A'e ire roga mozareḡanono'o buau'ete'e ḡisiḡa teigiro. E'ano'o idu e'eano'o ḡisi u'ano, mada zu adure'a uzaboraro.

³ Ebu hena ḡisi e'eano'o fihore'a rahao bua ariro, ebu ze'e Badi'a mazaono'o rahao asiasi inaraḡa heuḡa inara meiro.

⁴ Badi'a'a 'ahige rae ziro, "Raha veḡa ga rahao ḡuhure'ete'e ḡauḡa ga ire nidu'a ago sausauno'i, rehano Badi'a imoro zehereze rana o'o'a azaḡa da'o sausauzo'i."

⁵ Ze'e vaze 'uguḡa zimi'ete'e inaraḡa'e mene meiro, rehano bato fu'o zamaḡano aduga zenoga'e idaḡa rae reiro. Ze'a aduga zenadu e'e azaḡa'e gigi'a boro hidiro. Zeḡe gigi'a'e asiasi'a vaze asize gigize'ete'e teigiro.

⁶ E'e madaḡano gigi'a hidirote'e azaḡani'a rune ibiḡa vaḡi'uma, rehano mene horoni'uma. Ze'e rudanoga urate huni'uma, rehano rune'a ze mazaono'o fera'uma.

⁷ Fihore iraze'e uti veize ruhibirote'e hosiḡa heuḡa. Vadinizeo golo hina haḡairote'e kini

* 9:1 9:1 *Abisi*

vadini adiriḡa heuḡa ridiro, ebu ubumaze'e vase ubuma heuḡa.

⁸ Vadinize iguḡa'e roḡae vadini iguḡa heuḡa, zu ḡononeze'e laioni ḡonone heuḡa.

⁹ Ze'e u'uni bire'ete'e ḡauḡa vidaro. A'e auri hina haḡairote'e ḡauḡa heuḡa. Isaze ḡokeḡa'e hosi ḡehaḡani'a hasise'ete'e kiugani'a uti on-ame'ena'a, borofe ḡokere'ete'e heuḡa.

¹⁰ Avaze zu goheze'e asiasi heuḡa. Avaze'e bato fu'o vase sausauze'ete'e inaraḡazeta.

¹¹ Ze idu vo huneono'o bua erirote'e tuḡureḡa viga'e zeḡe kini rae reiro. Kini niḡa'e Heberu ḡoe'ano Abadoni,[†] u Giriki ḡoe'ano'e Apoliona.[‡]

¹² Aduga boro ibi'a'e hauḡiro. Rehano aduga boro aheuḡa 'ize are'ohe.

¹³ Tuḡure viga fu'o tiba fareḡani'a bigoroḡa hudirotene, e Badi'a zamao golo hina haḡairote'e dibu'o fataḡa genāḡa araḡa ḡazaḡaono'o ago 'ahoga igiro.

¹⁴ Ago e'e'a tuḡure viga fu'o tiba fareḡa bigoroḡeta 'ahige rae niro, "Euferate vuḡa boro zamaḡano batuzirote'e tuḡureḡa viga ḡazaḡa fuhi'e aheto'i."

¹⁵ E'ano'o tuḡure viga ḡazaḡa fuhi'e ahetiro. Ze'e vase nidu'aono'o uḡide rovozadu tiba mone rovonoga azaḡa zimifine, e'e madaḡa, e'e batoḡa zu e'e muriḡa veize Badi'a'a ruhibiro.

¹⁶ E tuḡure viga ḡazaḡa mone uti azaḡa nidu'a'e nugu rae igiro. Ze'e hosi rana ehoraḡu utite'ete'e azaḡa, ebu zeḡe nidu'a'e 200 milioni.

[†] 9:11 9:11 Huga'e Ruizoga.

[‡] 9:11 9:11 Huga'e Ruize'ete'e Vazeḡa.

¹⁷ E ahiri ra'aga iġunaġano hosi ġehaġa zu hosi e'e rana ehore'ete'e azaġa horoziro. Ze u'unize bire'ete'e ġauġa vidaro. U'unize bire'ete'e ġauġa'e ire roga heuġa kanaġa, zu buluġa, zu ġau 'ahoga niġa sulifu\$ heuġa boraġa. Hosi vadini'e laioni vadiga heuġa, ebu hebezeono'o ire roga, ġisi zu sulifu'a buaro.

¹⁸ Hosi hebezeono'o buarote'e ire roga, ġisi zu sulifu—aduga uġidu e'e 'ahine, vase nidu'aono'o uġide rovozadu tiba mone rovonoga azaġa'e rudaro.

¹⁹ Hosi hebezeo zu avazeo inarazeta. Avaze'e mohe heuġa, ebu avazeo'e vadinizeta. Ze avazeo vadinize nu hina vase sausauziro.

²⁰ Rehano aduga 'uguġanono'o mene rudarote'e azaġa nidu'a'e 'evoreze hina haġairote'e haġaiġanono'o mene ġihuriro. Ze'e vine sau'a zu ġuriro badi'aġa mazao kuranoga mene modiro. Ġuriro badi'aġa'e golo, siliva, kopa, hadi zu ire hina haġadu ze ehamanoga, abitoga zu ragavoga'e mene idaġa. Rehano vase'a zeġe mazao kuranoga'e mene modiro.

²¹ Zuni ze vase zemoga, murava haġaiġa, daro fu'a ebu ġonoreono'o mene ġihuriro.

10

Tuġure Viga ebu So'a Ġuaġa Komeġa

¹ Ebu hena e tuġure viga ġiġi'a 'ahoga adureono'o ovaoga horoniro. Ġoze'a ani varahiro ebu

§ 9:17 9:17 Sulifu'e ire roga ufeta ġiġi'aġano haġaifine ti'ohe ebu ufeta ġezau'ohe.

vadiga rana'e mezonegeta. Ani ubuma'e mada heuğa, ebu ani oda'e ire roga gadoğa heuğa.

² Ani'e 'evo'ano so'a ġuağa komeğa vava'oga obone radiro. Eda'e odağa'e davara rana edaro, ebu kauri odağa'e raha rana edaro.

³ Ebu laioni'a gudau'ete'e teige ago boro hina ġihau huario. Ani'a huarotene, viri fu'o aheu fare'a gudau'ena'a ġoeriro.

⁴ Viri fu'o aheu fare'a gudau ġoerirotene, e nariga ġoere e'e mirihe fariro. Rehano e adureono'o ago 'ahogani'a 'ahige rae reirote'e igiro, "Viri fu'o aheu fare'a reirote'e ġoe'a'e 'u'uru to'i. A'e ago miriho'i."

⁵ Ebu hena eġe'a horonirote'e tuġureğa viga, davara rana zu raha rana edau radiu'ete'e tuġureğa vigan'i'a eda'e 'evo'a adure ġoha mae ġihiniro.

⁶ Ebu ani'a radiu tuġutuġu Badi'ağa, adure zu adureo ġau nidu'a, raha zu rahao ġau nidu'a, ebu davara zu davarao ġau nidu'a haġairote'e Badi'ağa niġano 'ahige ġoere rinede tiro, "Badi'a'a toġanirote'e madağa mene sasi'uma.

⁷ Tuġure viga fu'o aheu fareġani'a bigoroğa hudite'e madaġano, Badi'a'a toġanirote'e ġauğa 'u'uru tirote'e'a huda'uma. A'e ane tuġure azağa, peroveta azağa ihozirote'e idunaġano huda'uma."

⁸ Ebu hena adureono'o e'a igirote'e agoġani'a bare 'ahige ġorehiro, "Ġa onamadu davara rana zu raha rana edau'ete'e tuġureğa viga 'evo'ano so'a ġuağa komeğa vava'oga mo'i."

⁹ E'ano'o e tuġure viga e'e vaġe onamadu so'a ġuağa komeğa e'e enoga uminiro. Ebu tuġure

vigani'a 'ahige ihiro, "'Ahi madu ano'i. E'e aune, g̃ae hebeo'e 'avore godaḡa teige iniga re'uma, rehano g̃ae isio'e agi'a re'uma."

¹⁰ E'a tuḡure viga e'e 'evo'anono'o so'a g̃uaḡa komeḡa madu aro. A'e hebeheo 'avore godaḡa teige iniga, rehano e'e arote'e enogano'e isiheo agihiro.

¹¹ Ebu hena 'ahige ihiro, "Ḡa'a vase nunu, haba'ahaba'a azaḡa, ḡoere nunu azaḡa zu kini nunu moneo Badi'a ḡoere bare rae furene huni'uma."

11

Badi'a Ḡoere rae Furenirote'e Azaḡa Aheu

¹ Iniu'a tuḡu teige faḡa zu rafaḡa udahe'ete'e somoriḡa 'ahoga iniro, ebu 'ahige ihiro, "Ḡa onamadu Badi'a kuru neḡa zu dibu'o fataḡa faḡa ebu rafaḡa nugu'e udaho'i, ebu vase nidu'a nugu'a e'ea kurau'ete'e me'odo'i.

² Rehano kuru neḡa enoga haba'a'e ago zamaro'i ebu ago udaho'i, mazaḡa a'e Iuda mene azaḡa ziniro. Ze'e bato 42 zamaḡano ne boro zaḡoḡa, Ierusalema edau ḡahini'uma.

³ Ebu eḡe'a eḡe ḡoere rae furene'ete'e azaḡa aheu inara zini'uma. Ze zamaze aduga rae ihozifine dabua ḡu'a vidanadu mada 1,260 zamaḡano eḡe ḡoere rae fureni'uma."

⁴ Ze'e raha 'adi Zuhi'aḡa Boro zamao edau'ete'e olivi ireḡa aheu ebu ihure odaḡa aheu rae idaziro.

⁵ Iniu'a ze sausauihi rae reine, hebezeono'o ire roga'a buanadu agireze ruizi'uma. Iniu'a ze zimihi rae ra'ete'e vazega'e 'ouge mau runi'uma.

⁶ Ze zeḡe'a Badi'a ḡoere rae furene'ete'e zamaḡano irugu'a mene ru'anoga veize adure 'ue'ete'e inaraḡa meiro. Ebu ze vu ruo ḡihune'ete'e inaraḡa meiro, zu ze urate'ete'e madaḡa nidu'a zamaḡano raha 'ahi aduga nunu hina sausaune'ete'e inaraḡa meiro.

⁷ Zeḡe aheu'a Badi'a ḡoere rae furene hauḡine, idu vo huneono'o butu agireḡani'a bua eraḡu ze utitozi'uma ebu ze raharahazadu zimi'uma.

⁸ Ebu zeḡe rune ahi'a'e zeḡe Zuhi'a Boro satauronirote'e haba'a, ne boro ḡihi'aḡa ibiḡano mode tauḡi'uma. Ne boro a'e Sodoma zu Izipi rae idani'uma.

⁹ Vaze nunu nidu'a, urabo nidu'a, ḡoere nunu azaḡa nidu'a, ebu haba'ahaba'a azaḡa nidu'a mada uḡidu ḡaha'eta zamaḡano rune ahirize muriri'uma, ebu rune ahirize guroga hezahoha'uma.

¹⁰ Rahao radiu'ete'e azaḡani'a rune ahirize u'ano matu'i'uma, zu mui haḡai'uma, ebu ḡahunone ḡahugotiti'uma. Mazaḡa peroveta azaḡa aheu e'e'a rahao radiu'ete'e azaḡa ḡigi'a boro ziniro.

¹¹ Rehano mada uḡidu ḡaha'eta enogano, Badi'a mazaono'o ḡaboze'ete'e irineḡani'a bua-nadu rune ahirize zamaḡano diuḡiro. 'Ougadu ze odaze hina edaro ebu ze muririrote'e azaḡa'e ufeta rihau ḡouri.

¹² Ebu ze adureono'o ago boro 'ahogani'a 'ahige zi'ete'e igiro, "Iahi ero'i." 'Ougadu ze ḡoze hina adure ḡoha itiro, u zeḡe agire azaḡa'e e'e muriri.

¹³ E'e madaḡano, raha'a borofe hagariro, ebu ne boro e'e zamaḡano ne nidu'aono'o

gaubananao rovonadu tiba mone rovonoga neġa nidu'a'e higaro. Raha'a hagariro 'ahine, vase nidu'a 7,000'a rudaro. Ebu mene rudarote'e azaġa nidu'a'e rihau rudaro zu adureo Badi'a niġa mae ġihiniro.

¹⁴ Aduga boro aheuġa'e hauġiro, rehano uġiduġa'e nariga are'ohe.

Bigoro Fu'o Aheu Fareġa

¹⁵ Tuġure viga fu'o aheu fareġani'a bigoroġa hudirotene, adureo ago boro'a gudanadu 'ahige rae reiro,

“Emeġe Zuhi'a Boro Badi'a zu ani'a ohotirote'e vazegā, Keriso'a raha nidu'a ibitozi'uma.

Ebu Badi'a'a zuhi'azi'uma, onamo radiu tuġutuġu.”

¹⁶ Ebu Badi'a zamao kini ehoro iġu'ano ehore'ete'e azaġa, ekalesia ibitozi'ete'e azaġa 24'a Badi'a mazao ġuġuradu kuraro.

¹⁷ Ze 'ahige rae reiro,

“Zuhi'a Boro Badi'a Gigi'aġa,

ġa'e izidi radiu'ete'e zu ibite radirote'e Badi'aġa.

Eme ġae mazao manoġa tauġi ra'ohe,
mazaġa ġae'a gigi'a boro hune madu
ġau nidu'a zuhi'azoga ġadahiro.

¹⁸ Haba'ahaba'a azaġani'a ġae mazao maġuniro,
rehano ġae zama ġugi'e zeġe mazao
fureniro.

Rune azaġa kotazite'e madaġani'a feuriro.

Ġae tuġure azaġa, peroveta azaġa, ġae
mone azaġa, ebu

iniu nize boro ga nize kome'a, ġae
guba'e'ete'e azaġa mazao

naeḡa manogā zinite'e madaḡani'a feuriro.
Raha nidu'a ruine'ete'e azaḡa ruizite'e
madaḡani'a feuriro."

¹⁹ Ebu hena adureo Badi'a kuru neḡa vava'iro,
ebu ane kuru neḡa zamaḡano ane ḡoitore ḡoe'a
tirote'e mauḡaḡa horoniro. E'e madaḡano vaza-
hiro, borofe gudaro, viri'a fu'uriro, raha'a ha-
gariro, ebu ḡoze hatu'aḡani'a borofe buaro.

12

Roḡae Zu Isona Horeḡa

¹ Ebu hena haḡai nu badeḡa boro 'ahogani'a
adureo fureraro. Roḡae 'ahogani'a mada'e
dabua teige vidaro, ebu bato'e ani oda 'u'uḡano
zu vadiga rana kini vadini adiriḡa ridiro. Ane
kini vadini adiriḡa'e buzuva gaubanana aheu
fareḡeta.

² Ani'e ahi'eta, ebu ene nariga furene'ete'e
u'ano gigi'a madu ḡihau ḡaniḡanaro.

³ Ebu hena haḡai nu badeḡa 'ahogani'a
adureo fureraro. A'e isona horeḡa kanaḡa.
Vadiga nidu'a'e fu'o aheu fare zu araḡa nidu'a'e
gaubanana. Vadigano kini vadini adiriḡa fu'o
aheu fare vidaro.

⁴ Ani avaḡani'a adureo buzuvaḡa nidu'aono'o
uḡide rovonadu tiba mone rovonoga buzuvaḡa'e
fodadu rahao feuniro. Ebu isona horeḡani'a
roḡae e'e zamao edaro, mazaḡa roḡae e'e'a
nariga ene fureni'uma 'ahine, ene furene'ete'e
madaḡa huneo isona horeḡani'a eneḡa atihi rae
reiro.

⁵ Ebu roḡae 'ai ubuga 'ahoga fureniro. Ubuga'e
auri somoriḡa riḡa hina haba nidu'a zuhi'azite'e

vazeġa. Rehano Badi'a'a ene guraġa a'e mae vaġinadu ani'a Badi'a zu Badi'a kini ehoru iġu'a ġoha itiro.

⁶ Ebu roġae e'e'a haba boha'a ferau onamiro. De'ea mada 1,260 zamaġano vaze'a ani taufoga veize Badi'a'a haba 'ahoga ruhibiro.

⁷ Ebu hena adureo uti'a fureraro. Tuġure viga ġihi'aġa, niġa Mikaela zu ane tuġure vigavigani'a isona horeġa teite utitiro. Isona horeġa zu ane tuġure vigavigani'a zuni zeġe teite utitiro.

⁸ Rehano Mikaela zu ane tuġure vigavigani'a isona horeġa zu ane tuġure vigaviga raharahazadu habaze adureo'e dauġiro.

⁹ E'ano'o isona horeġa'e adureono'o mae feune buniro. Ani'e ibite huneono'o radiu onainute'e moheġa, ebu niġa'e Diabolo ga Satani rae hune'ohe. Ani'e raha azaġa nidu'a so'ozadu ve'oze ibitozi'ohe. Ani rahao mae feuniro zu ane tuġure vigaviga zuni ane teite mae feuziro.

¹⁰ Ebu hena e adureo ago boro 'ahogani'a 'ahige ra'ete'e igiro,

“Izidi Badi'a'a ane mone azaġa ġabozeha.

Ani'a ane inaraġa zu ani'a zuhi'azi'ete'e ihozeha. Ani'a ohonirote'e vazeġa, Keriso'a gigi'aġa ihozeha.

Sau'a ġauġani'a emeġe nego nabudi ve'oġa rae agiroziro,

ebu ohere zu madaio Badi'a zamao ze'e sau'a rae agiroziro.

Rehano sau'a ġauġa'e mae feune buneha.

¹¹ Ebu emeġe nego nabudi'a Mamoe Ubuga ru u'ano

zu ze'a rae furenirote'e gōe'a u'ano sau'a
gāuḡa raharahaneha.
Zeḡe'a ḡaboneze mene zamariro, onamo rune
hideha.
¹² E'ano'o adure zu adureo radiu'ete'e azaḡa,
matu'o'i!
Rehano rahao zu davarao radiu'ete'e azaḡa, za
aduga boro hidi'uma,
mazaḡa Diabolo'a zae vaḡe ovaeha.
Ani'e zama ḡugi boroḡeta,
mazaḡa ani edeḡa, ane mada'e futu'a."

*Isona Horeḡani'a Roḡae Mariga Utitozifine
Ruhibiro*

¹³ Isona horeḡani'e rahao mae feunirota'a'e
ane'a bare ederirotene, ubuga furenirote'e
roḡaeḡa e'e vaḡe uhine onamiro.

¹⁴ Rehano roḡae e'e'a haba boha'ano radoneḡa
haba'a rafiū onamoga veize ugabada boro isaḡa
aheūḡeta haro. E'e haba'a'e Badi'a'a ani
veize ruhibiro, ebu ani de'ea isona horeḡaono'o
vaḡinadu muri uḡidu ḡaha'eta zamaḡano vaze'a
ani tauḡiro.

¹⁵ Ebu hena isona horeḡani'a hebe'anono'o vu
boro hina roḡae e'e ḡaruga furure vanadu ani
mae vaḡinihi reiro.

¹⁶ Rehano raha'a ani dananiro. Raha'a
hebe'a vava'adu isona horeḡani'a hebe'anono'o
fururirote'e vuḡa boro uniū.

¹⁷ Ebu hena isona horeḡani'a roḡae e'e mazao
maḡune rudanadu roḡae e'e mariga bo'aḡano
ḡabode'ete'e azaḡa utitozenoga veize onamiro.
Roḡae mariga'e Badi'a goro gōe'a egohau'ete'e
zu Iesu moneo rae furene'ete'e azaḡa.

18 Ebu isona horegani'a davara ni'uriganō edaro.

13

Butu Agirega Ibi'a

¹ Ebu hena e butu agirega 'ahogani'a davaraono'o bua are'ete'e horoniro. Ani araḡa nidu'a'e gaubanana zu vadiga nidu'a'e fu'o aheu fare. Araḡa tibatiba rana'e kini vadini adiriḡa ridiro, zu vadini tibatiba rana'e Badi'a rae sausaune'ete'e niḡa e'e.

² E'a horonirote'e butu agirega'e butu agirega 'ahoga, a'e leopadi heuḡa. Rehano ani oda'e bea oda heuḡa zu ani hebe'e laioni hebe heuḡa. Isona horega e'e'a butu agirega mazao ane inara, ane kini ehoro iḡu'a zu gigi'aḡa ufeta boro haro.

³ Butu agirega vadini nidu'a bo'aḡano vadini tiba'e idiri boro madu horonoga'e nariga rudaro. Rehano idiriḡa a'e manoradu raha azaḡa nidu'a'e zaguzagaro ebu butu agirega e'e hegotiro.

⁴ Vazevaze'a isona horega e'e mazao kuraro, mazaḡa ani'a ane gigi'a butu agirega haro. Ze'e butu agirega e'e mazao zuni kuraro ebu 'ahige rae reiro, "Butu agirega 'aha teige'ete'e vazega inaraḡa'e o'o'a! Iniu'a ani utitoha'uma?"

⁵ Badi'a'a butu agirega'e ane'a bare nigunoga zu Badi'a rae sausaunoga'e idaḡa rae reiro, ebu bato 42 zamaḡano ani vase sausauze'ete'e inaraḡa haro.

⁶ Ani hebe'a vava'adu Badi'a rae sausauniro. Ebu Badi'a ni zu Badi'a radone haba'a ebu adureo radiu'ete'e azaḡa rae sausauziro.

⁷ Badi'a'a ani'e Badi'a mone azağa utitozenoga zu raharahazoga'e idağa rae reiro. Ebu urabo nidu'a, vase nunu nidu'a, goere nunu azağa nidu'a, zu haba'ahaba'a azağa nidu'a zuhi'azi'ete'e inarağa haro.

⁸ Vaze'a marote'e Mamoeğa Ubugani'a buka 'ahogano gabozite'e azağa nize mirihiro. Nize'e Badi'a'a 'izema gau nidu'a hağaoganono'o mirihiro. Raha azağa bo'ağano e'e bukağano Mamoe Ubugani'a iniu nize mene mirihirote'e azağa nidu'a'e butu agireğa e'e mazao kura'uma.

⁹ Iniu teğağeta vazega'e 'ahi ego'i:

¹⁰ Badi'a'a vase 'ahogani'a vase 'ahoga hube hune obone teadu gu'a neğano ohonoga'e idağa rae reine,
ani hube hune obone teadu gu'a neğano diugi'uma.

Badi'a'a vase 'ahogani'a vase 'ahoga hube hune benisi hina manoga'e idağa rae reine,
ani hube hune benisi hina manadu ruda'uma.

E'ano'o Badi'a mone azağa'e aduga zamağano zamaze obone gigane huni'uma, zu ze'a fie'eta'a'e mene hune modi'uma.

Butu Agireğa Aheuğa

¹¹ Ebu hena e butu agireğa 'ahogani'a ra-haono'o bua are'ete'e horoniro. Ani mamoe ubuga heuğa arağa aheu, rehano isona horeğa teige goeriro.

¹² Ani'a butu agireğa ibi'a inarağa nidu'a hina butu agireğa ibi'a veize gauiro. Ebu ani'a raha zu rahao radiu'ete'e azağa'e butu agireğa ibi'a mazao kuranoga veize tutuziro. Butu agireğa

ibi'a'e ibite idiri boro madu nariga rudaro rehano, bare manoriro.

¹³ Butu agireğa aheugani'a hağai nu badeğa ġihi'ağa hağairo. Vaze nidu'a murire'ete'e zamağano, ani'a adureono'o rahao ire roga tuğune buniro.

¹⁴ Ani'e butu agireğa ibi'a mazaono'o meirote'e inarağa hina butu agireğa ibi'a veize hağai nu badeğa hağairo. Ani'e e'e hağaiğa nu badeğa hina rahao radiu'ete'e azağa so'oso'oziro. Ani'a zeğ mazao 'ahige rae reiro, "Butu agireğa ibi'a veize ane irağa teige hağairote'e irağa 'ahoga hağao'i." Butu agireğa ibi'a'e ibite benisiono'o idiri boro meiro rehano, bare ġabodiro.

¹⁵ Butu agireğa aheuğa'e butu agireğa ibi'a mazaono'o meirote'e inarağa hina, butu agireğa ibi'a irağa teige hağairote'e irağa 'ahoga zamağano irineğa haro. 'Ougadu e'e irağani'a ġoeroga idararo, ebu ani'a ani mazao mene kurau'ete'e azağa zemoga zuni idararo.

¹⁶ Ebu butu agireğa aheugani'a vaze nidu'a ibitozeadu zeğ eda'e 'evo'a rafağano ga zehereze rana tahi 'ahoga mae tiro. Nize kome'a zu nize boro, ma'ora zu zahara, tuğure azağa zu mene tuğure azağa nidu'a tahi e'e mae tiro.

¹⁷ Iniu tahi e'e mene meirote'e vazega'e ġau 'ahoga hoitoga ga seronoga'e mene idararo. Tahi a'e butu agireğa ibi'a ni ga niğa nabağa.*

¹⁸ Nabağa e'e huga faine ederifine zamarone huhuzağa mo'i. Iniu faine zamare'ete'e vazega'e

* **13:17 13:17** Giriki ġoe'a tibatiba'e nabağeta. Ni naba'e ni ġoe'a tibatiba nidu'a me'odirote'e nabağa.

butu agiregā ibi'a ni nabaḡa me'ode nuro'i. Nabaḡa a'e vaze 'ahoga niḡa ihoze'ohe. Niḡa nabaḡa'e 666.

14

Mamoe Ubuga ebu Vaze Nidu'a 144,000

¹ Ebu hena e'a ehamarotene, Sioni maḡano Mamoe Ubugani'a edau radiro. Ebu vaze nidu'a 144,000 ani teite edau radiro. Zehereze rana Mamoe Ubuga ni zu Moga ni mirihoga'e e'e.

² Ebu e adureono'o ago 'ahoga igiro. A'e vu boro ḡuhiḡani'a noau'ete'e teigiro zu viri'a ḡihau gudau'ete'e teigiro. E'a igirote'e agoḡa'e gabi arahōḡa azaḡani'a gabize arahohau'ete'e agoḡa teigiro.

³ Vaze 144,000 e'e'a kini ehoru iḡu'a zamao, zu ḡaboga ḡauḡa ḡazaḡa zamao, zu ekalesia ibitozi'ete'e azaḡa zamao bada iziga 'ahoga badahinu. Vaze 144,000 da'o bada e'e edeḡa. Ze'e raha azaḡa bo'aḡano runeono'o bohaze buzirote'e azaḡa.

⁴ Ze'e roḡae teite mene daroe futarote'e aru'aḡa teige, ahirize mene torane'ena'a, deheru 'aune radiro. Ze Mamoe Ubugani'a no'e onamine, ani hegote'ete'e azaḡa. Ze'e raha azaḡanono'o bohaze buziro ebu ire maḡa ibi'a teige, Badi'a zu Mamoe Ubuga veize dibu'irote'e azaḡa ibi'a.

⁵ Zeḡe mazao ḡuriro ḡoe'ani 'ahoga'e o'o'a, ebu ve'oḡani 'ahoga'e o'o'a.

Tuḡure Viga Uḡidu

⁶ E tuḡure viga 'ahogani'a adure nemaḡano rafi'u'ete'e horoniro. Ani'e rahao radiu'ete'e azaḡa nidu'a, haba'ahaba'a azaḡa nidu'a, urabo nidu'a, ḡoere nunu azaḡa nidu'a, zu vaze nunu nidu'a mazao haramoga veize radiu tuḡutuḡu hariḡa manoga mae ariro.

⁷ Ani ḡihau huau'ena'a, 'ahige rae reiro, “Badi'a gubano'i ebu niḡa mae ḡihino'i. Mazaḡa Badi'a'a kotazite'e madaḡani'a feureha. Adure, raha, davara zu vu nunu nidu'a haḡairote'e Badi'aḡa mazao kurano'i.”

⁸ Ebu hena ani ḡaruna tuḡure viga aheugani'a hegotadu 'ahige rae reiro, “Higaneha! Ne boro bagaḡa, Babulonia'e higaneha! A'e daro fu'a roḡaḡa heuḡa. Ani haba'ahaba'a azaḡa nidu'a tutuzadu ze vaini vuḡa sau'a bagaḡa gagiro zu ani teite daro fu'a haḡairo.”

⁹ Ebu hena zeḡe ḡaruna tuḡure viga uḡiduḡani'a hegotadu ago boro hina 'ahige rae reiro, “Iniu butu agireḡa zu ane iraḡa teige haḡairote'e iraḡa mazao kurau'ena'a, zeherezeo ga 'evoreze rafaḡano ani tahi ma'ete'e azaḡa'e,

¹⁰ Badi'a zama ḡugi teige'ete'e vainiḡa vuḡa gagi'uma. Vaini vuḡa a'e vu teite mene mirunadu ufeta riḡa, ebu Badi'a zama ḡugi'a bioḡano be'uniro. Ebu ze tuḡure viga zaḡoḡa zu Mamoe Ubuga zamao ire roga zu sulifu u'ano, gigi'a boro hidi'uma.

¹¹ Gigi'a boro zini'ete'e ire rogaḡa ḡisiḡa'e ḡisa'uma onamo tuḡutuḡu. Butu agireḡa zu ane iraḡa teige haḡairote'e iraḡa mazao kurau'ete'e azaḡa ga ane ni tahiḡa ma'ete'e vazega'e, ohere zu madaio ahirize ohonoga'e mene idara'uma.”

¹² E'ano'o Badi'a mone azaḡa, zae'a Badi'a goro ḡoe'a hegote'ete'ea, zu Iesu mazao fie obone gigane'ete'ea, zamaze obone gigane huni'uma.

¹³ Ebu hena e adureono'o ago 'ahogani'a 'ahige ra'ete'e igiro, "I'ahi miriho'i: Izidi onamo iḡaiḡa Zuhi'a Boro teite tiburanadu radiu'ena'a rudau'ete'e azaḡani'a manohuga hide'ohe." Badi'a Vine'a 'ahige naenaene'ohe, "O'e, ze zeḡe gauono'o bohatanadu ahirize ohoni'uma, mazaḡa ze zeḡe haḡai manoḡa naeḡa hidi'uma."

Rahao Hiriviro

¹⁴ Ebu hena e ehamarotene, ḡoze 'uruḡa 'ahoga'e e'e. Ḡoze e'e rana Vaze Ubuga heuḡa 'ahogani'a ehore radiro. Ani vadinio'e golo hina haḡairote'e kini vadini adiriḡa ridiro zu benisi e'aḡa oboniro.

¹⁵ Ebu hena tuḡure viga 'ahogani'a kuru neḡanono'o buau aradu ḡoze rana ehore radiu'ete'e vazēḡa mazao ago boro hina 'ahige huau ḡoeriro, "Benisiḡo madu hirivo'i, mazaḡa rahao hirivite'e ogomuḡa'e hiḡudadu hirive'ete'e madaḡa'e feureha."

¹⁶ E'ano'o ḡoze rana ehore radiu'ete'e vazēḡani'a benisiḡa raha rana masiniro ebu raha ogomuḡa hiriviro.

¹⁷ Ebu hena tuḡure viga 'ahogani'a adureo kuru neḡanono'o buau ariro ebu ani zuni benisiḡa e'aḡa oboniro.

¹⁸ Ebu hena tuḡure viga 'ahogani'a dibu'o fataḡanono'o ariro. Ani'e dibu'o fataḡa rana ire roga taufe'ete'e inaraḡa meiro. Ani'a ago boro

hina benisi e'ağa meirote'e tuğureğa viga mazao 'ahige huario, "Benisiğō e'ağa madu rahao vaini ireğanono'o vaini e'ōğa nu nu'ono'i, mazağa vaini mağamağa'e hiğudeha."

¹⁹ E'ano'o tuğure vigani'a raha rana benisiğa hina masinadu vaini mağamağa mae nu'oniro, ebu vaini mağamağa mo'inadu vaini vuğa hağae'ete'e iduğa boro bagağa zamağano feu-niro. A'e Badi'a zama ġugi'a ihoze'ohe.

²⁰ Vaini vuğa hağae'ete'e iduğa'e ne boro ġutu'ağano hağairo. Idu e'e zamağano vaini mağamağa rana edanadu moinirotene, idu e'eano'o ru'a sore buaro. Ru'e ufeta boro hune soronadu vu boro teigiro. Ru'e hosi hebe miniğa hanini itiro zu 300 kilomita fağa sore onamiro.

15

Tuğure Vigavigani'a Ġonaga Adugağa Boro Odohe Ariro

¹ Ebu hena e adureo zaguzagatite'e hağaiğa nu badeğa ġihi'ağa 'ahoga horoniro. Tuğure viga fu'o aheu fare'a aduga boro fu'o aheu fare meiro. A'e aduga boro ġonaga, mazağa e'e adugağani'a haūġine Badi'a zama ġugiğani'a ġonabi'uma.

² Ebu e galasi hina hağairote'e davarağa ire roga teite tiburanağa teigirote'e horoniro. Zuni vase nu'a galasi davarağa genağano edau'ete'e horoziro. Ze'e butu agireğa zu ane irağa teige hağairote'e irağa zu ane ni nabağa rahara-hairote'e azağa. Ze'e Badi'a'a zinirote'e gabiğa obone edau radiro.

³ Ebu ze Badi'a tuğure vazega Mose bada zu Mamoe Ubuga bada badahiro,

“Zuhi'a Boro Badi'a Gigi'ağa,
hağaiğō'e ġihi'ağa,
zu vaze'a horonadu zaguzagau'ohe.

Ġa'e haba'ahaba'a azağa nidu'a Kini,
ibiğō'e dudugā zu huga.

⁴ Zuhi'a Boro, iniu'a ġa mene riho'i'uma?
Zu iniu'a niğō mene mae ġihini'uma?

Ġae tibuhuga'e zağōğa.

Haba'ahaba'a azağa nidu'a ġae vağe ari'uma,
zu ġae mazao kura'uma,

mazağa ġae hağai dudugani'a fureraro.”

⁵ E'e enogano e ehamarotene, adureo kuru neğa vava'iro. A'e Badi'a'a ane mone azağa teite radirote'e dibu'oğa taruhağa heuğa.

⁶ Aduga boro fu'o aheu fare meirote'e tuğureğa viga fu'o aheu fare'a kuru neğanono'o buau ariro. Ze'e dabua deheğa manōğa zu vazavaza-hoga vidaro, ebu golo miniğa u'unizeo abiriro.

⁷ Ebu hena ġaboga ġauğa ġazağa bo'ağano 'ahogani'a golo hina hağairote'e siuvağa fu'o aheu fare'e tuğure viga fu'o aheu fare ziniro. Siuva e'e zamağano'e radiu tuğutuğu Badi'ağa zama ġugi'ağani'a iri'aviro.

⁸ Ebu Badi'a ni ġihi'ağanono'o zu gigi'ağanono'o ġisi'a buanadu kuru neğa zamağano iri'aviro. 'Ougadu vazeni 'ahogani'a kuru neğa zamağano diuğoga'e mene idararo, onamo tuğure viga fu'o aheu fare'a odohe'ete'e adugağa boro fu'o aheu fare'a ġonabi'uma.

16

Badi'a Zama Ġugi Ufirote'e Siuvağa

¹ Ebu hena e kuru neḡanonono'o ago boro 'ahoga igiro. Ago e'e'a tuḡure viga fu'o aheu fare 'ahige rae ziro, "Onamadu Badi'a zama ḡuḡi ufirote'e siuvaḡa fu'o aheu fare rahao be'uno'i."

² E'ano'o tuḡure viga ibi'ani'a onamadu ane siuva rahao be'uniro. 'Ougadu idiri ḡiḡaroḡa zu ḡiḡi'aḡani'a iniu butu agireḡa tahi meirote'e azaḡa zu ane iraḡa teige haḡairote'e iraḡa mazao kurarote'e azaḡa rana fureraro.

³ Tuḡure viga aheuḡani'a ane siuva davarao be'uniro. 'Ougadu davara'e rune vazeḡa ru teige nufiro, ebu davarao radiu'ete'e ḡaboga ḡauḡa nidu'a'e rudau hauḡiro.

⁴ Tuḡure viga uḡiduḡani'a ane siuva vu boro zamaḡano zu idu vuḡano be'unadu vu nidu'a'e ruo reiro.

⁵ Ebu e vu taufe'ete'e tuḡureḡa vigani'a 'ahige ra'ete'e igiro,

"Badi'a Zaḡoḡa, ḡa'e izidi radiu'ete'e zu ibite radirote'e Badi'aḡa.

Ḡae'a 'ouge ze kotazirota'a'e duduḡa.

⁶ Ze'a ḡae mone zaḡoḡa azaḡa zu peroveta azaḡa zemadu ruze soronirote'e u'ano, ḡae'a ru ze gagoziniro.

'Ouge ze'a haḡaize sau'a naeḡa mouga'e duduḡa hune."

⁷ Ebu e ago 'ahoga dibu'o fataḡanonono'o 'ahige naenaenirote'e igiro, "O'e, Zuhi'a Boro Badi'a Ḡiḡi'aḡa, ḡae kota'e huga zu duduḡa."

⁸ Ebu hena tuḡure viga ḡazaḡaḡani'a ane siuva mada rana be'uniro. Ebu mada'a ire roga hina vase iri'ete'e inaraḡa Badi'a mazaono'o meiro.

9 'Ougadu ze'e mada gigi'a bagaḡani'a iri haoziro. Rehano ze'a aduga e'e ibitohau'ete'e inaraḡa meirote'e Badi'aḡa niḡa rae sausauniro. Ze zamaze ḡihunoga zu Badi'a ni mae ḡihinoga hezahoharo.

10 Ebu hena tuḡure viga fu'oḡani'a ane siuva butu agireḡa kiniḡa ehoru iḡu'ano be'uniro. 'Ougadu butu agireḡani'a zuhi'azi'ete'e haba'a nidu'a uzaboraro. Vaze idirize'a ufeta gigizadu ze mazaneze vihoniro.

11 Zeḡe gigi'a zu idiri u'ano ze adureo Badi'a rae sausauniro. Ebu ze zeḡe'a haḡairote'e haḡaiḡa moneo mene ḡihuriro.

12 Ebu hena tuḡure viga fu'o tiba fareḡani'a ane siuva vu boro 'ahoga, niḡa Euferate rana be'uniro. 'Ougirotene, vu'a revaranadu mada'a ite'ete'e moneono'o kiniḡakiniḡa ibi ruhibiro.

13 Ebu e vine toraga uḡidu feḡoza heuḡa horoziro. Ze'e isona horeḡa hebeono'o zu butu agireḡa hebeono'o zu ḡuriro peroveta vazeḡaono'o bua ariro.

14 Ze'e vine sau'a. Ze haḡai nu badeḡa haḡae'ena'a, raha nidu'a zamaḡano kini nidu'a vaḡe ragave'ohe. Ze Gigi'a Badi'aḡa mada boro meite'e madaḡano fureratite'e utiḡa veize raha kiniḡa nidu'a nu'ozifine 'ouge ragave'ohe.

15 Zuhi'a Boro'a 'ahige ra'ohe, "Ḡiano'i, e ḡonore vazeḡa teiḡe ari'uma! Iniu evate ra-diu'ena'a, ane dabua taufe'ete'e zu firina mene ragave'ete'e zu vaze ubumao mazagaro mene furene'ete'e vazeḡa'e matu'i'uma."

16 Ebu hena vine sau'a uḡidu'a kini nidu'a'e haba 'ahogano nu'oziro. Haba niḡa'e Heberu

gōe'ano Aramagedono rae huniro.

¹⁷ Tuḡure viga fu'o aheu fareḡani'a ane siuva hitanao be'uniro. 'Ougirotene, adureo kuru neḡa zamaḡano kini ehoṛo iḡu'anono'o ago boro 'ahogani'a buanadu 'ahige rae reiro, “Gau nidu'a haḡae hauḡeha!”

¹⁸ Ebu agaḡani'a vazavazahiro, zu ago boro'a fureraro, zu viri'a fu'uriro, zu raha'a borofe hagariro. Vaze'a rahao radirote'eano'o onao izidi raha'a 'ouge borofe hagarirote'e mene horoniro.

¹⁹ Ne boro bagaḡa, Babulonia'a varadanadu uḡiduo reiro, ebu haba'ahaba'a neḡa boroboro'a hiḡaro. Badi'a'a ne boro bagaḡa, Babulonia azaḡa haḡai sau'a zamariro, e'ano'o ane zama ḡuḡi'a boro hune be'une iri'avonirote'e vaini vuḡa bioḡa ziniro.

²⁰ Raha'a borofe hagariro 'ahine, 'umu nidu'a'e dauḡiro ebu maḡamaḡa zuni mene bare horoniro.

²¹ Ebu adureono'o ḡoze hatu'aḡani'a vaze rana buaro. Ḡoze hatu'aḡa tiba aduga'e nariga 50 kilo heuḡa. Ḡoze hatu'aḡa u'ano aduga ufeta riḡa bagaḡa hidiro 'ahine, ze Badi'a rae sausauniro.

17

Roḡae Daro Fu'a zu Butu Agireḡa

¹ Badi'a zama ḡuḡi iri'avonirote'e siuvaḡa fu'o aheu fare meirote'e tuḡureḡa viga fu'o aheu fare bo'aḡano 'ahogani'a eḡe vaḡe aradu 'ahige rae reiro, “Aro'i, eḡe'a vu boro ḡehaḡa genaḡano ne boro bagaḡani'a aduga hidite'e moneo iho'i'uma. Ne boro a'e roḡae daro fu'a bagaḡa heuḡa.

² Raha kiniḡakiniḡani'a roḡae e'e teite daroe futaro ebu rahao radiu'ete'e azaḡani'a ane vaini vuḡa gagadu ane daro fu'a haḡaiḡa hegotiro."

³ Ebu Vine Zaḡoḡani'a eḡe rana reirotene, eḡe tutuhe haba boha'a onamiro. E'ea roḡae 'ahogani'a butu agireḡa kanaḡa rana ehore'ete'e horoniro. Butu agireḡa ahi'a rana'e Badi'a ni rae sausaune'ete'e niḡaniḡa mirihogani'a iri'aviro. Ebu vadiga nidu'a'e fu'o aheu fare zu araḡa nidu'a'e gaubanana.

⁴ Roḡae a'e dabua peporoḡa zu kanaḡa vi-daro, ebu golo zu naeḡa boro hadiḡa nunu ebu gudugudu naeḡa boro hina rohorohoniro. Ani 'evo'ano golo bioḡa oboniro. Bio zamaḡano'e Badi'a'a he'ehe'ene'ete'e ḡauḡa zu ane daro fu'a toragani'a iri'aviro.

⁵ Zehereḡano'e ni 'ahoga mirihoga e'e. Ni e'e huga'e 'u'uruḡa. A'e 'ahige rae mirihiro,

"Ne Boro Bagaḡa Babulonia,

Daro Fu'a Roḡaeḡaroḡaeḡa Vize,

Rahao Badi'a'a He'ehe'ene'ete'e Ḡauḡa Nidu'a Vize."

⁶ E roḡae a'e gagone fu'a horoniro. Ani'a Badi'a mone azaḡa ruze ufeta gagiro. Ze'e Iesu moneo rae furenirote'e azaḡa.

E roḡae e'e horonadu zaguzagau rudaro.

⁷ Rehano tuḡure vigani'a 'ahige ihiro, "Ḡa nougadu zaguzagau'ohe? Eḡe'a roḡae e'e moneo 'u'uru touga iho'i'uma. Ebu ani'a ehore'ete'e butu agireḡa moneo 'u'uru touga iho'i'uma. Butu agireḡa vadiga'e fu'o aheu fare zu araḡa'e gaubanana.

8 Ġae'a horonirote'e butu agireġa'e ibite radiro, rehano izidi'e o'o'a. Ani'a vesu'u idu vo huneono'o* bua eradu Badi'a'a ani ruine haugi'uma. Rahao radiu'ete'e azaġa bo'aġano nu'a ani horonadu zaguzaga'uma. Ze'e raha zu adure haġairote'e madaġanono'o iniu ġabozite'e azaġa nize mirihirote'e bukaġano nize o'o'a azaġa. Butu agireġa a'e ibite radiro, rehano izidi o'o'a, ebu vesu'u arite'e u'ano, ze ani horonadu zaguzaga'uma.

9 Zamarone huhuzaġa hina faine zamare huni'uma. Butu agireġa vadiga fu'o aheu fare'e roġae e'e'a ehore'ete'e maġaġa fu'o aheu fareo idaniro.

10 Zuni maġamaġa a'e kini fu'o aheu fareo idaniro. Kini fu'o'e rudaro, rehano 'ahoga'e radiu'ohe. Ebu 'ahoga'e 'ize mene areha, rehano ani'a arine mada tahiġa da'o radi'uma.

11 Ibite radiro rehano, izidi mene radiu'ete'e butu agireġa'e kini fu'o uġidu fareġa rae re'uma. Ani'e ibite kini fu'o aheu fare bo'aġano 'ahoga, ebu Badi'a'a ruine huni'uma.

12 Ġae'a horonirote'e araġa gaubanana'e kini gaubananao idaniro. Ze 'ize raha azaġa zuhi'azite'e mene ġadahiro, rehano butu agireġa e'e teite zuhi'azi'ete'e kiniġa inaraġa mada tahiġa da'o me'uma.

13 Ze zamaze tibano inaraze zu gigi'aze butu agireġa ha'uma.

14 Ze zu butu agireġa'e Mamoe Ubuga uti-toha'uma, rehano Mamoe Ubugani'a zeġe nidu'a

* 17:8 17:8 *Abisi*

raharahazi'uma. Mazaḡa ani'e zuhi'a nidu'a vitize'ete'e Zuhi'aḡa Boro zu kini nidu'a vitize'ete'e Kiniḡa. Mamoe Ubuga ḡatine'ete'e azaḡa'e Mamoe Ubugani'a huzirote'e zu ohotirote'e azaḡa. Ze'e zamaze nidu'a hina ani hegote'ete'e azaḡa."

¹⁵ Ebu tuḡure viga e'e'a 'ahige ihiro, "Ḡae'a roḡae daro fu'a e'e'a vu boro ḡehaḡa genaḡano ehore radirote'e horoniro. Vu boro a'e vase nunu, vase ḡuḡuvaḡa nunu, haba'ahaba'a azaḡa nunu, zu ḡoere nunu azaḡano idazi.

¹⁶ Ḡa'a horonirote'e butu agireḡa zu araḡa gaubanana'e roḡae daro fu'a he'ehe'eni'uma. Ze'e ani ruini'uma zu firinoha'uma. Ze ani modare a'uma zu ire roga hina hufi haoni'uma.

¹⁷ Mazaḡa ze'a 'ouge haḡaoga veize Badi'a'a zamarone 'uguḡa zamazeo tiro. E'ano'o ze Badi'a ura haḡai'uma, ebu ze zeḡe'a zuhi'azi'ete'e inaraḡa'e butu agireḡa e'e ha'uma rae ḡoere idani'uma, onamo Badi'a ḡoere'a huda'uma.

¹⁸ Ḡae'a horonirote'e roḡaeḡa'e ne boro багаḡa e'e. Ne boro багаḡa e'e'a raha kinigakiniḡa zuhi'azi'ohe."

18

Babulonia'e Higaro

¹ E'e enogano, e tuḡure viga 'ahogani'a adure-ono'o ovaoga horoniro. Ani'e inara boro meiro. Ani aḡaḡa'e vazavazahoga u'ano raha nidu'a aganiro.

2 Ani'a ago boro hina 'ahige huau goeriro, "Higaneha! Ne boro bagaḡa, Babulonia'a higaneha! Ani'e Diabolo radone haba'a reiro, zu vine sau'a toraga nidu'a neḡa reiro, ebu vaze'a he'ehe'eze'ete'e niniḡa toraga nidu'a neḡa reiro.

3 Mazaḡa haba'ahaba'a azaḡa nidu'a Babulonia'a zinirote'e vainiḡa vuḡa riḡa gagadu ani teite daroe futaro. Raha kinḡa nidu'a ani teite daroe futaro ebu rahao serosere'ete'e azaḡa'e ma'orao reiro, mazaḡa Babulonia'a hadi naeḡa boroboro ḡauḡa ufeta hoitiro."

4 Ebu hena e adureono'o ago 'ahogani'a 'ahige ra'ete'e igiro,

"Eḡe vaze nidu'a, Babulonia neḡanono'o buano'i.

'Ougine zae'a ani haḡai sau'a mene hegoti'uma,

zu ani'a hidite'e adugaḡa za mene hidi'uma.

5 Mazaḡa ani haḡai sau'a'e gudiru itadu adure haniniro.

Badi'a'a ani haḡai sau'a zamare'ohe.

6 Ne boro e'e'a zae sausauzirote'e idunaḡano zae'a e'e naeḡa baronohano'i.

Ne boro e'e'a haḡairote'e haḡaiḡa idunaḡano, e'e naeḡa ḡae aheu ufeta ragate baronohano'i.

Ne boro e'e'a aduga hide'ete'e bioḡa zae ziniro.

E'ano'o za'e aduga ḡae aheu ufeta ragate hidite'e bioḡa hano'i.

7 Ne boro e'e'a niḡa mae ḡihiniro zu hadi naeḡa boroboro hoite'ena'a matu'e radiro.

E'ano'o haḡaiḡa e'e idunaḡano gigi'a zu zama aroga hano'i.

Ne boro e'e'a zamao 'ahige ra'ohe,
'E kini roḡaeḡa radu vase zuhi'azi'ohe.
E mene ḡozoba.
E'ano'o zamahe mene hune ari'uma.'

⁸ E'ano'o mada tiba zamaḡano ne boro e'e aduga
boro hidi'uma,
rune hidi'uma, zamaḡa aradu nia'uma, zaga
hidi'uma,

ebu ire roga hina hufi haoni'uma.

Mazaḡa ne boro e'e kotane'ete'e Zuhi'aḡa
Boro Badi'aḡa'e gigi'a hune.

⁹ Raha kiniḡa nidu'a'e ne boro e'e teite daro
futaro, zu naeḡa boroboro ḡauḡa hoite'ena'a
matu'e radiro. Ze ne boro e'e hufi haone'ete'e
ire rogaḡa ḡisiḡa horonadu niau kua'uma.

¹⁰ Ze'e ne boro e'e'a hide'ete'e adugaḡa ri-
hone'ena'a, faḡano edanadu 'ahige re'uma,

'Aduga boro hideha,

Ne boro ḡihi'aḡa, ne boro inaraḡa,
Babulonia, aduga boro hideha!

Mada tahiḡa fase zamaḡano Badi'a'a ḡa rui'eha.'

¹¹ Rahao serosere'ete'e azaḡani'a ani u'ano
niau ḡoinahi'uma, mazaḡa zeḡe mazaono'o ḡau
'ahoga bare hoitite'e azaḡani 'ahoga o'o'a.

¹² Zeḡe'a seronirote'e ḡauḡa'e golo, siliva,
naeḡa boro hadiḡa, gudugudu naeḡa boro,
dabua manoḡa tauḡi, dabua peporoḡa, dabua
vazavazahoga, dabua kanaḡa, ire hohoḡa nunu,
elefaniti ḡonoga hina haḡairote'e ḡauḡa naeḡa
boro nunu, naeḡa boro ireḡa nunu, kopa zu
auri zu hadi manomano hina haḡairote'e ḡauḡa
nunu,

¹³ iniga zu naeġa boro niġa Sinamono,* eġa nunu, 'uvahu hohoġa, murava hohoġa, dehorohohoġa, vaini vuġa, olivi dehorohohoġa, 'uvahu zu vuidi, boromakau zu mamoe, hosi zu hosi kiugā. Ze vase zuni tuġure azaġano seroziro.

¹⁴ Ġau 'uguġa seronirote'e azaġani'a ne boro e'e mazao 'ahige re'uma, 'Ġae'a meihi rae urate hunirote'e ġauġa manoġa nidu'a'e dauġeha. Ġau ġehaġa nidu'a zu naeġa boroboro ġauġa nidu'a ġae mazaono'o dauġadu 'uguġa mene bare horoni'uma!'

¹⁵ 'Uguġa ġauġa ne boro e'e azaġa mazao seronadu ma'orao reirote'e serosero azaġa'e ne boro e'e'a aduga boro hidirota'a'e rihonadu faġano edau'ena'a, niau ġoinahi'uma. Ebu ze 'ahige re'uma,

¹⁶ 'Aduga boro hideha! Ne boro ġihi'aġa, aduga boro hideha!

Ani'a dabua manoġa tauġi, dabua peporoġa zu kanaġa vidaudo,

ebu golo, hadi naeġa boro nunu zu gudugudu naeġa boro hina rohorohido.

¹⁷ Rehano mada tahiġa fase zamaġano ġau ġehaġa nidu'a a'e ruiniro!'

Ġasi boro azaġa, ġasi boro zamaġano tirirote'e azaġa, ġasi boro gau azaġa ebu davarao gaue'ete'e azaġa nidu'a faġano eda'uma.

¹⁸ Ze'a ne boro e'e hofoga ġisiġa horonirotene, agoze boro hina 'ahige huau ġoeri'uma, 'Ne boro 'ahiguġa heuġa neġa 'ahoga'e o'o'a hune!'

* **18:13 18:13** A'e ire 'ahoganono'o haġae'ohe. Hohoġa iniga hune zu naeġa boro.

19 Ebu ze zeḡe'a bare kono vadinizeo feuni'uma,[†] ebu niau ḡoinahe'ena'a, 'ahige ḡihau hua'uma,

'Aduga boro hideha! Ne boro ḡihi'aḡa, aduga boro hideha!

Ḡasi boro hina davarao ḡau nunu seronirote'e azaḡa nidu'a'e ma'orao reiro, mazaḡa ne boro e'e'a hadi boro hina zeḡe ḡau hoitido.

Rehano mada tahiḡa fase zamaḡano ne boro e'e ruineha!

20 Adureo radiu'ete'e azaḡa, ne boro 'ai ruiniro 'ahine, matu'o'i,

Badi'a mone azaḡa, apostolo azaḡa zu peroveta azaḡa, matu'o'i,

mazaḡa ne boro e'e'a zae sausauzirote'e u'ano, Badi'a'a zae veize ne boro e'e kotaniro."

21 Ebu hena tuḡure viga gigi'aḡa 'ahogani'a vuidi duine se'ene'ete'e hadiḡa boro багаḡa heuḡa hadiḡa boro 'ahoga mae ḡihinadu davarao feuniro, ebu 'ahige rae reiro,

"Hadi boro 'ahi ḡihau feunirote'e teige, ne boro ḡihi'aḡa, Babulonia mae feuni'uma, ebu ne boro e'e mene bare horoni'uma.

22 Gabi va'ete'e azaḡa, bada ma'ete'e azaḡa, sura'i hudi'ete'e azaḡa zu bigoro hudi'ete'e azaḡa ago'e

ne boro e'e zamaḡano mene bare igi'uma.

Ḡau nunu haḡae'ete'e azaḡa'e ne boro e'e zamaḡano

mene bare horozi'uma,

[†] 18:19 18:19 Iuda azaḡa haḡai. Ze ufeta zama are'ete'e ihozifine, 'ouge haḡae'ohe.

vuidi duine se'ene'ete'e hadiḡa boro bagaḡa
agoḡa'e ne boro e'e zamaḡano
mene bare igi'uma.

²³ Ihure agaḡa'e ne boro e'e zamaḡano
mene bare agara'uma,
hahu iziga ohozeḡa zu roḡaeḡa agoze'e ne boro
e'e zamaḡano
mene bare igi'uma.

Mazaḡa ne boro e'e mone serosere'ete'e azaḡa
inara'e raha 'adao ufeta boro hune reiro,
ebu ne boro e'e'a murava haḡaiḡa hina
haba'ahaba'a azaḡa nidu'a so'oso'oziro.

²⁴ Ne boro e'e zamaḡano peroveta azaḡa zu
Badi'a mone azaḡa ruze,
ebu rahao zimirote'e azaḡa nidu'a ruze'e
horoniro."

19

Adureo Badi'a Nigune'ohe

¹ E'e enogano e adureo vase ḡuḡuvaḡani'a
huau'ete'e teige, ago boro igiro. Ze 'ahige rae
huaro,
"Haleluia!

Emeḡe Badi'a'a ḡabofiro. Ani'e ḡihi'a hune zu
gigi'a hune.

² Ane kota'e huga zu duduḡa.

Raha azaḡa tutuzadu daro fu'a haḡaiḡa ibiḡano
sausauzirote'e roḡaeḡa daro fu'a e'e
kotaniro.

Roḡae e'e'a Badi'a tuḡure azaḡa zemadu ruze'a
soriro 'ahine,
Badi'a'a roḡae e'e naeḡa baronoharo."

³ Ebu adureo vaze ġuġuvaġani'a bare 'ahige rae huario,

“Haleluia!

Ne boro e'eano'o ire roga ġisiġani'a ite'ohe onamo radiu tuġutuġu.”

⁴ Ekalesia ibitozi'ete'e azaġa 24 zu ġaboga ġauġa ġazaġani'a ġuġuradu kini ehoro iġu'ano ehore'ete'e Badi'aġa mazao kuraro, ebu 'ahige rae reiro,

“Amen, Haleluia!”

⁵ Ebu kini ehoro iġu'anono'o ago 'ahogani'a bua aradu 'ahige rae reiro,

“Badi'a tuġure azaġa nidu'a

zu ani gubane'ete'e azaġa nidu'a

ebu ni kome'a zu ni boro azaġa nidu'a,

emeġe Badi'a niguno'i!”

⁶ Ebu hena e vaze ġuġuvaġani'a ġoere'ete'e teige ago 'ahoga igiro. Ago a'e vu boro ġuhiġani'a noau'ete'e teigiro zu viri'a borofe fu'ure'ete'e teigiro. Ago e'e'a 'ahige huario,

“Haleluia!

Zuhi'a Boro emeġe Badi'a Gigi'aġani'a ġau nidu'a zuhi'azi'ohe.

⁷ Matu'e rudatihi

zu ane ni mae ġihinihi.

Mazaġa Mamoe Ubuga hahu madaġa 'ai feureha zu ane hahu roġaeġa iziga'e ane'a bare rohorohonadu ruhibeha.

⁸ Badi'a'a dabua deheġa manoga vazavazahoga ane hahu roġaeġa izigani'a vidanoga veize haro.”

Dabua manoga tauġi'e Badi'a mone azaġa haġai duduġa rae idane'ohe.

⁹ Ebu tuḡure vigani'a ihiro, "'Ahige miriho'i: Mamoe Ubuga mui zamaḡano huzirote'e azaḡa'e matu'e rudau'ohe." Ebu bare 'ahige ihiro, "A'e Badi'a ḡoere huga."

¹⁰ Ebu hena e ani mazao kuratihi radu odaḡa babaḡano ḡuḡuriro, rehano ani ihiro, "Ago 'ougo'i! Eḡe zuni ḡa ebu ḡae nego nabudi heuḡa tuḡure vazēḡa, ebu eme'e Iesu moneo rae furene'ete'e azaḡa. Badi'a mazao kurano'i, mazaḡa Iesu moneo rae furene'ete'e azaḡa'e Vine Zaḡoḡani'a ihoze'ete'e ḡoe'a rae furene'ohe."

Hosi 'Uruḡano Ehoṛe'ete'e Vazeḡa

¹¹ E adure vava'oga horonirotene hosi 'uruḡa 'ahoga e'e. Ebu vase 'ahogani'a hosi e'e rana ehore radiro. Ani ni'e Zama Nidu'a Hina Haḡaoga, zu Huga. Ani'a ibi duduḡano ko-taze'ohe ebu utite'ohe.

¹² Ani ubuma'e ire roga duhuḡa heuḡa ebu vadigano kini vadini adiriḡa ḡehaḡa ridiro. Ebu ahi'a rana'e ni mirihoga 'ahoga e'e. Vazeni 'ahoga zuni ni e'e aḡu'a, rehano ane da'o edeḡa.

¹³ Ani'e dabua ruḡeta vidaro, ebu ani ni'e Badi'a Ḡoere.

¹⁴ Adure uti azaḡani'a hosi 'uruḡa rana eho-radu ani hegotinu. Ze'e dabua deheḡa manōḡa tauḡi vidaro.

¹⁵ Ani hebeono'o'e benisi e'aḡani'a buanadu haba'ahaba'a azaḡa ruizi'uma, ebu ani'a auri somoriḡa gigi'aḡa hina zuhi'azi'uma. Vaze'a vaini vuḡa haḡaifine vaini maḡamaḡa rana edanadu moine'ete'e teige, ani'a agire azaḡa

edeze ġahizi'uma. Badi'a Gigi'aġa zama ġugi'a'e boro hune 'ahine, 'ouge aduga zini'uma.

¹⁶ Ane dabua zu manigano'e ni 'ahoga 'ahige rae mirihiro, 'Kini Nidu'a Kiniġa zu Zuhi'a Nidu'a Zuhi'aġa.'

¹⁷ Ebu hena e tuġure viga 'ahogani'a mada rana edanoga horoniro. Ani'a hitana huneo rafi'u'ete'e niniġa nidu'a mazao ago boro hina 'ahige ġihau ġoeriro, "Aro'i. Badi'a mui boro veize nu'orano'i.

¹⁸ Kini azaġa, uti azaġa boroboro, vase inarazeta, hosi zu e'e rana ehorirote'e azaġa, tuġure azaġa nidu'a zu mene tuġure azaġa nidu'a, nize kome'a zu nize boro azaġa rune ahiri modareze ano'i."

¹⁹ Ebu hena e butu agireġa zu raha kiniġa azaġa zu zeġe uti azaġani'a hosi 'uruġa rana ehorirote'e vazegħa zu ane uti azaġa teite utitoga veize nu'orarote'e horoziro.

²⁰ Rehano hosi 'uruġa rana ehorirote'e vazegħa zu ane uti azaġani'a butu agireġa obone tiro, ebu butu agireġa mone edanadu haġai nu badeġa haġairote'e ġuriro peroveta vazegħa zuni ani teite oboze tiro. Peroveta vazegħa a'e haġai nu badeġa haġadu butu agireġaono'o tahi meirote'e azaġa zu butu agireġa iraġa teige haġairote'e iraġa mazao kurarote'e azaġa so'oso'ozirote'e vazegħa. Hosi 'uruġa rana ehorirote'e vazegħa zu ane uti azaġani'a butu agireġa zu ġuriro peroveta vazegħa'e ġabona oboze teadu sulifu hina hufi'ete'e ire rogaġa du'uraġano feuziro.

²¹ U iniu ire roga du'uraġano mene feuzirote'e azaġa nidu'a'e hosi rana ehorirote'e vazegħa

hebeono'o buarote'e benisiḡa hina zimiro, ebu nini nidu'a'e rune ahiri modareze anadu isize miniro.

20

Muri 1000

¹ Ebu hena e tuḡure viga 'ahogani'a adure-ono'o ovaoga horoniro. Ani'a idu vo hune vava'e'ete'e kiḡa zu auri adiriḡa boro 'evo'ano oboniro.

² Ani'a isona horeḡa e'e obone tiro. Isona horeḡa a'e Diabolo ga Satani, ebu ibite hune radiu onainute'e moheḡa. Tuḡure vigani'a isona horeḡa e'e auri adiriḡa boro hina susadu muri 1,000 zamaḡano obone tiro.

³ Ane'a idu vo huneo isona horeḡa e'e mae feunadu ibihetaḡa hararo ebu vase 'ahogani'a mene vava'oga veize ibihetaḡa 'uiro. A'e isona horeḡa e'e'a haba'ahaba'a azaḡa mene so'ozifine ra'ohe, onamo muri 1,000 ḡonaga. E'e enogano ani mae bunadu mada tahiḡa radi'uma.

⁴ Ebu hena e kini ehoru iḡu'ano ehore'ete'e azaḡa horoziro. Ze'e kotaze'ete'e inaraḡa Badi'a'a zinirote'e azaḡa. Ebu e vase vine nu horoziro. Ze'e Iesu moneo rae fureniro zu Badi'a ḡoere rae fureniro 'ahine, vadinize vari'e modirote'e azaḡa. Ze'e butu agireḡa zu ane iraḡa teige haḡairote'e iraḡa mazao mene kuraro, ebu zeherezeo zu 'evoreze rafaḡano butu agireḡa tahi mene meiro. Ze'e ḡabodadu Keriso teite muri 1,000 zamaḡano ḡau nidu'a zuhi'aziro.

⁵ (Rune azağa nu'e mene ġabodiro onamo muri 1,000 ġonaga meiro.) A'e Badi'a'a rune azağa bare ġabozrote'e madağa ibi'a.

⁶ Badi'a'a rune azağa bare ġabozrote'e madağa ibi'aġano bare ġabodrote'e azağa'e zaġoġa zu matu'e rudau'ohe. Rune aheuġani'a ze zuhi'azite'e inaraġa'e o'o'a. Ze'e Badi'a zu Keriso veize gaue'ete'e dibu'oġa azaġano re'uma ebu Keriso teite muri 1,000 zuhi'azi'uma.

Satani Ruini'uma

⁷ Muri 1,000 enogano Satani'e ane ġu'a neġanono'o mae buni'uma.

⁸ Ani'a buanadu raha nidu'a zamaġano avoavo radiu'ete'e haba'ahaba'a azağa so'ozoga veize onami'uma. E'e haba'ahaba'a nize'e Goga zu Magoga. Satani'e uti veize ze nu'ozi'uma ebu zeġe nidu'a'e davara ni'uriġa teige ġehara'uma.

⁹ Ze'e raha naenae nidu'a oname hauġadu Badi'a mone azağa radone haba'a zu Badi'a zamarone neġa boro merau 'uiro. Rehano ire roga'a adureono'o ovadu ze hufi haoziro.

¹⁰ Ze so'ozrote'e Diaboloġa zuni sulifu hina hufi haone'ete'e ire roga du'uraġano mae feu-niro. Ire rogaġa du'uraġa a'e butu agireġa zu ġuriro peroveta vazegani'a radiu'ete'e haba'a. De'ea ze ohere zu madai gigi'a boro me'uma onamo tuġutuġu.

Rune Azaġa Kotazi'uma

¹¹ Ebu hena e kini ehoru iġu'a 'uruġa ġihi'aġa ebu e'e rana ehorrote'e Badi'aġa horoniro. Ani zamao raha zu adure'a dauġadu iġurize mene bare horoniro.

¹² Ebu e rune azağa, nize boro zu nize kome'a azağa nidu'a kini ehoro iğu'a e'e zamao edau'ete'e horoziro. Ebu buka nu vava'iro, a'e rune azağani'a hağairote'e hağağa nidu'a mirihirote'e bukağa. Ebu buka 'ahoga zuni vava'iro, a'e ġabozite'e azağa nize mirihirote'e bukağa. Rune azağa'e buka nu e'e zamağano mirihirote'e teige, ze hağairote'e hağağa idunağano kotaziro.

¹³ Davarao rudarote'e azağa zuni kini ehoro iğu'a zamao edaro. Ebu rudanadu rune azağa habao* radiu'ete'e azağa zuni kini ehoro iğu'a zamao edaro. Ebu zeğē nidu'a ze'a hağairote'e hağağa idunağano kotaziro.

¹⁴ Ebu hena rune azağa zu zeğē radone haba'a'e ire roga du'urağano mae feuziro. Ire roga du'urağa'e rune aheuğa.

¹⁵ Iniu ġabozite'e azağa nize mirihirote'e bukağano niğa o'o'a vazēğa'e ire roga du'urağano mae feuniro.

21

Adure Iziga zu Raha Iziga

¹ Ebu hena e adure iziga zu raha iziga horoniro. Adure ibi'a zu raha ibi'a 'ai daūgiro ebu davara zuni mene bare horoniro.

² Ebu e ne boro zağōga, Ierusalemā izigani'a adureono'o Badi'a mazaono'o ovaoga horoniro. Ani'e hahu iziga roğaeğani'a i'a veize faine rohorohadu ruhibirote'e teige manoğa tauği.

* 20:13 20:13 *Hadesi*

³ Ebu e kini ehoru iḡu'anono'o ago boro 'ahogani'a 'ahige ra'ete'e igiro, “Ġiano'i, Badi'a radone haba'a'e vase bo'aḡano e'e. Ani'e zeḡe teite radi'uma. Ze'e ani mone azaḡa rae re'uma, ebu ani'e ane'a bare zeḡe teite radi'uma, ebu ani'e zeḡe Badi'a rae re'uma.

⁴ Ani'a zeḡe ni vuḡa nidu'a ubumazeo za-uhi'uma. Rune'e mene bare furera'uma. Zamaze aroga, nianoga zu gigi'a zuni mene bare furera'uma, mazaḡa ḡau amahiḡa nidu'a dauḡiro.”

⁵ Ebu kini ehoru iḡu'ano ehorirote'e Badi'aḡani'a 'ahige rae reiro, “Ġiano'i, eḡe'a ḡau nidu'a izife haḡae'ohe.” Ebu ani bare 'ahige rae reiro, “'Ahi miriho'i, mazaḡa ḡoere 'ahi'e huga ebu vase nidu'a mae ḡihinite'e ḡoe'a.”

⁶ Ebu ani bare 'ahige ihiro, “Eḡe'a 'ahi nidu'a haḡae hauḡeha! E'e Alefa zu Omega, ḡadaheḡa zu ḡonaga. Iniu iriga mo'one'ete'e vazeḡa'e eḡe'a ḡabone'ete'e iduḡa vuḡa naeḡa o'o'a ha'uma.

⁷ Iniu sau'a ḡauḡa raharahane'ete'e azaḡa'e e'eguḡa nidu'a eḡe'a zini'uma. E'e zeḡe Badi'a rae re'uma ebu zeḡe nidu'a'e eḡe ubude rae re'uma.

⁸ Rehano riho fu'a azaḡa, mene fie'ete'e azaḡa, Badi'a'a he'ehe'ene'ete'e haḡaiḡa haḡae'ete'e azaḡa, vase mau'ete'e azaḡa, daro fu'a azaḡa, murava azaḡa, ḡuriro badi'aḡa mazao kurau'ete'e azaḡa, zu ḡuriro azaḡa nidu'a—zeḡe nidu'a radone haba'a'e ire roga zu sulifu hina hufi haoze'ete'e du'uraḡa rae re'uma. A'e rune aheuḡa.”

Ierusalem Iziga

⁹ Ġonaga adugaġa boro fu'o aheu fare ufirote'e siuvaġa fu'o aheu fare meirote'e tuġureġa viga fu'o aheu fare bo'aġano 'ahogani'a eġe vage aradu 'ahige ihiro, "Aroi, e'a Mamoe Ubuga inuga, hahu iziga roġaeġa iho'i'uma."

¹⁰ Ebu Vine Zaġoġa'e eġe rana radirote'e zamaġano, tuġure viga e'e'a eġe zamahadu maġa boro багаġa zu hitana hune itiro. Ebu adure-ono'o Badi'a mazaono'o ovae'ete'e neġa boro zaġoġa, Ierusalemah ihohiro.

¹¹ Ne boro a'e Badi'aono'o agaġa boro 'ahine, agaru deheraro. A'e naeġa boro hadiġa 'uruġa, niġa iasipa teige agararo, ebu galasi teige deheġa багаġa.

¹² Ne boro a'e ġabiri boro hitaga hina meraro zu ibihetaġa nidu'a'e gaubanana aheu fare. Ibi-heta nidu'ao tuġure viga gaubanana aheu fare'a edaro ebu ibiheta e'e rana'e Isaraela urabo nize gaubanana aheu fare mirihiro.

¹³ Ibiheta uġidu'e mada'a ite'ete'e moneo, zu ibiheta uġidu'e mada'a zubure'ete'e moneo, zu ibiheta uġidu'e naeġano,* zu ibiheta uġidu'e naeġano† e'e.

¹⁴ Ne boro ġabiriġa'e hadi boro gaubanana aheu fare rana ogoraro, ebu hadi e'e nidu'a rana'e Mamoe Ubuga apostolo azaġa gaubanana aheu fare nize gaubanana aheu fare mirihiro.

¹⁵ Eġe teite ġoerirote'e tuġureġa viga'e ne boro e'e zu ibihetaġa zu ġabiriġa udahoga veize golo hina haġairote'e somoriġa 'ahoga meiro.

¹⁶ Ne boro e'e genaġa ġazaġa mone nidu'a'e

* 21:13 21:13 south † 21:13 21:13 north

idağa radu fağa zu rafağa'e tiba. Ani'a udaho somoriğa hina ne boro e'e udahirotene, fağa'e 2,200 kilomita, ebu rafağa zu hitaga zuni tiba.

¹⁷ Ani'a ne boro ġabiriğa hitaga udahirotene, a'e 66 mita. A'e vaze'a ġau udahe'ete'e ibiğano udahiro ebu tuğure viga zuni e'e ibiğano udahiro.

¹⁸ Ġabiriğa'e naeğa boro hadiğa 'uruğa niğa iasipa hina ogoranadu agararo zu deheğa багаğa galasiğa heuğa goloğa huga hina ogoraro.

¹⁹ Ne boro ġabiriğa'e hadi boroboro rana ohoniro, ebu hadi boro nidu'a'e naeğa boro hadiğa nunu hina rohorohoniro: Hadi boro ibi'a'e naeğa boro hadiğa 'uruğa niğa iasipa, hadi boro aheuğa'e naeğa boro hadiğa buluğa niğa safaia, hadi boro uğiduğa'e naeğa boro hadiğa ġabodorağa niğa kalekedoni, hadi boro ġazağağa'e naeğa boro hadiğa ġabodorağa niğa samaragi,

²⁰ hadi boro fu'oğa'e naeğa boro hadiğa ba-rauniğa zu 'uruğa niğa onisi, hadi boro fu'o tiba fareğa'e naeğa boro hadiğa kanağa niğa sadio, hadi boro fu'o aheu fareğa'e naeğa boro hadiğa borağa niğa kurusolito, hadi boro fu'o uğidu fareğa'e naeğa boro hadiğa ġabodorağa niğa berulo, hadi boro fu'o ġazağa fareğa'e naeğa boro hadiğa borağa niğa topazo, hadi boro gaubananağa'e naeğa boro hadiğa ġabodorağa niğa kurusoparaso, hadi boro gaubanana tiba fareğa'e naeğa boro hadiğa buluğa niğa iasinito, ebu hadi boro gaubanana aheu fareğa'e naeğa boro hadiğa peporoğa niğa ametuso hina rohorohoniro.

²¹ Ibihetağa gaubanana aheu fare'e gudugudu naeğa boro gaubanana aheu fare hina hağairo, ebu ibihetağa tibatiba'e gudugudu naeğa boro tiba hina hağairo. Ne boro ibiğa boro'e galasi deheğa багаға teige golo huga hina hağairo.

²² E ne boro e'e zamağano kuru neğa mene horoniro, mazağa Zuhi'a Boro Badi'a Gigi'ağa zu Mamoe Ubugani'a ne boro e'e zamağano radadu kuru neğa teigiro.

²³ Ne boro e'e zamağano mada'a ga bato'a agaranoga mene urate'ohe, mazağa Badi'a agağani'a ne boro e'e agane'ohe zu Mamoe Ubuga'e ihure radu agane'ohe.

²⁴ Haba'ahaba'a azağani'a ne boro agağano radi'uma, ebu raha kiniğakiniğani'a zege ġau manomano madu ne boro e'e ari'uma.

²⁵ De'ea ohere o'o'a 'ahine, mada nidu'a ibiheta mene 'ui'uma.

²⁶ Haba'ahaba'a azağani'a ġau ġihi'ağa zu ġau manomano madu ne boro e'e ari'uma.

²⁷ Mene deheğa ġauğa nidu'a'e ne boro e'e diuğoga mene idara'uma, ebu mazagaro hağağa zu so'oso'o hağağa hağae'ete'e azağa zuni diuğoga mene idara'uma. Rehano iniu Mamoe Ubugani'a ġabozite'e azağa nize mirihirote'e bukağano nize e'e azağani'a da'o diuğoga idara'uma.

22

Ġabone Zini'ete'e Vuğa Boro

¹ Ebu hena tuğure vigani'a ġabozite'e vuğa boro ihohiro. A'e galasi deheğa багаға teige

agararo. Vu boro e'e'a Badi'a zu Mamoe Ubuga kini ehoro iġu'anono'o sore buaro,

² ebu ne boro ibiġa boro nemaġa sore onamiro. Vu boro naenaeo'e ġabone zini'ete'e ireġa e'e. Ire e'e maġa iraġa nunu'e gaubanana aheu fare, ebu maġa tibatiba'e bato tibatiba zamaġano hudau'ohe. E'e ireġa rouġa'e haba'ahaba'a azaġa uġiono'o manoze'ohe.

³ Ne boro e'e zamaġano'e radiu tuġutuġu adugaġa mene bare hidi'uma. E'ea Badi'a zu Mamoe Ubuga kini ehoro iġu'a e'e, ebu Badi'a tuġure azaġani'a ani mazao kura'uma.

⁴ Ze'e Badi'a iraġa horoni'uma ebu Badi'a ni'e zehereze ranao mirihi'uma.

⁵ E'ea ohere'e mene bare horoni'uma, ebu ihure ga mada agaġa mene urati'uma, mazaġa Zuhi'a Boro Badi'a'a agaġa zini'uma. Ebu ze'e ġau nidu'a zuhi'azi'uma onamo tuġutuġu.

Iesu'a Ari'uma

⁶ Tuġure vigani'a 'ahige ihiro, "Ġoere 'ahi nidu'a'e ġoere huga zu vase'a mae ġihine'ete'e ġoe'a. Zuhi'a Boro Badi'a'a ane Vine peroveta azaġa zini'ohe. Ani nagini'a ġarihe fureratite'e moneo ane tuġure azaġa ihozifine ane tuġure viga tuġuniro."

⁷ Iesu'a 'ahige rae reiro, "Ġiano'i, e ġarihe ari'uma! Buka 'ahi zamaġano irina rae furenirote'e ġoe'a hegote'ete'e vazega'e matu'e'ohe."

⁸ Eġe, Ioane'a 'ahi nidu'a igiro zu horonirote'e vazega. Eġe'a 'ahi nidu'a igiro zu horonirotene, e'e ihohirote'e tuġureġa viga mazao kuranoga veize odaġa babaġano ġuġuriro.

⁹ Rehano ani'a 'ahige ihiro, “Ago 'ougo'i! Eḡe zuni ḡa ebu peroveta azaḡa ebu 'ahi bukaḡano mirihirote'e ḡoe'a hegote'ete'e azaḡa teite gau tiba haḡae'ete'e tuḡureḡa vazegā. Badi'a mazao da'o kurano'i!”

¹⁰ Ebu ani'a 'ahige ihiro, “Buka 'ahi zamaḡano irina rae furenirote'e ḡoe'a ago 'u'uru to'i, mazaḡa 'uguḡa ḡoe'ani'a fureratite'e madaḡani'a haniteha.

¹¹ Iniu sau'a vazegā'e haḡai sau'a haḡae'ena'a radiu onamo'i, ebu toraga vazegā'e haḡai toraga haḡae'ena'a radiu onamo'i. Iniu duduḡa vazegā'e haḡai duduḡa haḡae'ena'a radiu onamo'i, ebu zaḡoḡa vazegā'e zaḡozaḡe radiu onamo'i.”

¹² Iesu'a 'ahige ra'ohe, “Ḡiano'i, e ḡarihe ari'uma. Vaze nidu'a zeḡe'a haḡairote'e haḡaiḡa idunaḡano naeze baronozini'uma.

¹³ E'e Alefa zu Omega, ibi'a zu ḡonaga, ḡadaheḡa zu ḡonaga ra'ohe.

¹⁴ Iniu dabuaze vuzu'e'ete'e azaḡa'e matu'e'ohe. Ze ḡabonezini'ete'e ireḡa vaḡe onamoga zu ne boro ibihetaḡanono'o ne boro zamaḡa diuḡoga'e idaḡa re'uma.

¹⁵ Rehano ḡuni heuḡa toraga azaḡa, murava azaḡa, daro fu'a azaḡa, vase mau'ete'e azaḡa, ḡuriro badi'aḡa mazao kurau'ete'e azaḡa, ḡuriro zamaradu ḡurire haḡae'ete'e azaḡa nidu'a'e ne boro enoneo radi'uma.

¹⁶ E'e Iesu. E ekalesia azaḡa, zae mazao eḡe tuḡure viga tuḡunadu ani'a eḡe ḡoere 'ahi ihoziro. E'e kini Davida mariga ḡihi'a hune zu irara buzuvaḡa agaḡa.”

¹⁷ Vine Zaḡoḡa zu Badi'a mone azaḡa hahu iziga roḡaeḡa teiḡe'ete'e'a Iesu mazao 'ahiḡe rae ra'ohe, "Aro'i!" Ebu iniu ḡoere 'ahi igi'ete'e azaḡa nidu'a zuni 'ahiḡe re'uma, "Aro'i!" Ebu iniu irine'a mo'one'ete'e vazēḡa zuni aro'i. Iniu urato'idene, ḡabone hau'ete'e vuḡa, naeḡa o'o'a ḡahunoneḡa mo'i.

¹⁸ Iniu buka 'ahao irina rae furenirote'e ḡoe'a igi'ete'e azaḡa nidu'a mazao e iradugu ḡoe'a riḡa zi'ohe. Iniu buka 'ahi ḡoe'a rana ḡoere 'ahoga ragate ti'ete'e vazēḡa'e Badi'a'a buka 'ahao reirote'e adugaḡa boro ha'uma.

¹⁹ Ebu iniu'a buka 'ahao irina rae furenirote'e ḡoe'a nidu'aono'o ḡoere 'ahoga mae vaḡinine, ani'a hidite'e manohugaḡa'e Badi'a'a mene ha'uma. 'Ougadu ani ne boro zaḡoḡa diuḡoga mene idara'uma zu ḡabone hatite'e ireḡa maḡa anoga'e mene idara'uma.

²⁰ 'Ahi nidu'a rae furene'ete'e vazēḡa, Iesu'a 'ahiḡe ra'ohe, "Hube hune ḡarihe ami'uma."

Amen. Zuhi'a Boro Iesu, aro'i!

²¹ Zuhi'a Boro Iesu'a Badi'a mone azaḡa nidu'a mazao manoḡa furene'eno'i. Amen.

Buka Zaḡoḡa Ġoitore Iziga
The New Testament in the Uare language of Papua
New Guinea

Nupela Testamen long tokples Uare long Niugini

copyright © 2017-2024 Wycliffe Bible Translators, Inc.

Language: Uare

Translation by: Wycliffe Bible Translators

Contributor: Global Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-08-11

PDF generated using Haiola and XeLaTeX on 11 Aug 2025 from source files dated 11 Aug 2025

c398f744-e34b-525a-a9fe-d04e84ab7b13